

Revelesen

Nægkiariien sə rani mə nəfe i nəkukuə

Jon in aposol riti səvəi Iesu Kristo. Nəp̄in kinərhi irapw in revən fwe tənə əmweris riti nəgh̄in nə Patmos nənə mirai nəkukuə i Revelesen. Jon rokeikei mə truvehi utə nətərigien səvəi nakalasia me səməme kamo nəmisəien m̄nraha ti nahatətəien səvənraha ia Iesu Kristo. Jon rokeikei mə nakalasia me tuhəukurən mə Kumwesən ramərimənu ia nəfe kamo ia t̄iprənə i. Ia nəkukuə i Nənimw̄in raməgkiari mamō səukurən mə Iesu Kristo in Iərimənu. In ramərimənu ia nərmama me pam m̄ine narimnari me pam, mamərimənu mwi ia nərmama səməme haməuvehi n̄iskaiien asori ia t̄iprənə i. Kumwesən trərpw̄in noien ərəha me səvəi nərmama m̄ine Setan ia kwopun napw rauək ik̄in. Kumwesən tro n̄itətə sə in ramərimənu irə trier irapw. In tro mwi neiai vi riti m̄ine t̄iprənə vi riti.

Nægkiariien sə rakupwən

¹ Nəkukuə i raməgkiari ia nari m nari me səməme Iesu Kristo r̄ino pui. Kumwesən riməuvei pen narimnari me i min mə in trahatən səvənhi iotukwininari me irə pwəh irəha hətoni mhəukurən narimnari me nəha r̄ipko mhə tui tuhaməkeikei mhəier pehe. Iesu rərhi pen agelo səvənhi revən məvisau pen narimnari me i m səvənhi iotukwininari riti nəgh̄in nə Jon.

² Jon nā rīrai pen ia nākukuə i narimnari me pam sə in rīnətoni. In i nāgkiariien sāvəi Kumwesən mine nāgkiariien sə Iesu Kristo rīni mā ro nīpərhiēnien.

³ Pwəh Kumwesən rəkwein amasan ia iərmama sə trəvsini irapw nāgkiariien me ia nākukuə i. Pwəh in rəkwein amasan mwi ia sāməme tuhəregi mhesi pen nāfe kīmərai pen ia nākukuə i. Iakani iamīnhi irə ti nəri nā mā nāpīn sə narimnari me i tuhəier pehe irə ruvəuvehe ipaka.

Jon rīrai nākukuə i revən ti nakalasia me ia taon me nəha sefen ia profens Esia

⁴ Iou Jon iakamrai nākukuə i rauvehe tuku-miaha nakalasia me ia taon me nəha sefen ia profens Esia. Iakəfwaki mā Kumwesən sə rīnarə fwe kupwən, marə ipwet mine, mamevən meste trīpkiwən mhə, in truvei pehe namasanien mine nāmərinuien m kīmiaha. Iakəfwaki mā nənīmwin me nəha sefen kupwən ia jea sə in raməkure irə mamərimənu,

⁵ mine Iesu Kristo irəha mwi tuho iamīnhi irə. Iesu Kristo in iərmama i rīməni irapw nāfe in rīnətoni mīregi nərmama həkurən nətīgiteien ia nāgkiariien sāvənhi. In iərmama i rīməkupwən mətui ia nərmama me sāməme həuvamhə. In iərmama i ramərimənu ia kīg me sāvəi tīprənə i. In ramokeikei kitaha, muvi nīten meivinarī ia kitaha irə mā noien ərəha me səkītaha ko həkəkwtəmhirī mhə mwi kitaha.

1:3: Rev 22:7,10 **1:4:** Eks 3:14-15, Rev 1:8, 3:1, Rev 4:5,8, 5:6, Rev 11:17, 16:5, Aes 11:2 **1:5:** Jon 18:37, Kol 1:18, Sam 89:27, Rev 3:14, 17:14, 1Jon 1:7, 4:10

⁶ In ro kītaha sāmwhen ia kig me mine pris me ia nāmri Tata Kumwesən sāvānhi. Pwəh nasorien mine nārīmānuien krauevən tukwe in ia nuk nuk me. Ouəh pwəh ro iamīnhi.

⁷ Hətə ro. In rauvehe ia reri nəpuə me.

Nərmama me pam tuhətoni in ia nənimenraha.

Irəha sāməme hənəpi in ia nitei,

mine nərmama ia kwənəkwas me pam ia təkure tīprənə i tuhətoni, rerinraha rəpou hasək tukwe.

Ouəh pwəh ro iamīnhi.

⁸ Kumwesən səkītaha rani iamīnhi irə mə, “Iou i Alfa mine Omeka.^a Iakīnarə fwe kupwən, marə ipwet mine, mamevən meste tapkiwən mhə. Iakauvehi niskaiien me pam.”

Jon rətoni Iəmāti Iərmama

⁹ Iou Jon piəvmiaha riti. Kītaha miou samarə pəri ia nəkwai nitətə Iesu ramərīmānu irə. Iakamərer əknekin kītaha m kīmiaha ia nāmīsəien me sāməme kamo m kītaha tī nəghin. Nəpīn riti fwe kupwən kəmri pen iou iakarə ia tənə əmweris riti nəghin nə Patmos.^b Irəha həmri pen iou fwe ikin tī nəri nə mə iakaməvisau irapw nəgkiariien səvəi Kumwesən mine nəgkiariien sə Iesu rīni mə ro nīpərhiēnien.

1:6: 1Tes 2:5,9, Rev 5:10, 20:6 **1:7:** Mat 24:30, Jon 19:34-37

1:8: Rev 1:4, 15:3, Rev 21:6, 22:13 **a 1:8:** Alfa in leta sə rukupwən ia alfapet səvəi nəkur Kris. Omeka in leta sampam. Nahəg i kaməkwein Kumwesən irə nīpwran mə in nukunen mine nəkrəkwerin. Əvsini mwī Rev 21:6, 22:13. **1:9:** Rev 6:9 **b 1:9:** Patmos in tənə əmweris riti kəmri pen Jon fwe ikin rəmwhen mə in ramarə ia kalapus.

10 Ia nəpɪn səvəi lərimənu səkɪtaha iakətoni vison riti Nənimwɪn rəriari miou. Ia vison nəha iakregi iərmama riti raməgkiari ia təkutak rerin rasori rəmwhen ia kisipw,

11 mini mə, “Rai pen ia nəkukuə nəfe ikamətoni, nənə mərhi pen nəkukuə nəha revən ti nakalasia me səməme kamharə ia taon me nəha sefen. Nəghi taon me nəha Efesas mine Smana mine Pekamam mine Tuatira mine Satis mine Filatelfia mine Laotisia.”

12 Iakuvsi iou mə takətoni mə sin nəha raməgkiari pehe miou. Nəpɪn ikuvsi iou mətoni nəri laet raməkure utə irə irəha pam sefen kino ia kol. 13 Ia kurkwanraha iərmama riti rəmwhen ia iəməti iərmama riti. Tinari səvənhi rəpwəmwɪs. Rəkwan nari kino ia kol rukurau ia kwənpwenhin.

14 Nɪmwai nukwənen rəpsan rəmwhen ia nɪmwheri sipsip. Rəpsan pɪk rəmwhen ia nisəkwai təsi.^C Nənimen mi krouəmwhen ia nərami napw.

15 Nisun mi krauser rouəmwhen ia aean nəha prons sə kuvani ia napw mə sə rərəha traiu raka. Rerɪn rəmwhen ia nui asori sə ramivə mamierig.

16 In rauvehi kəməhau me sefen ia rəgin mwatuk. Nau səvəi naruaɡənien rəhiə ia nɪkaren mi ruku pen ia nɪpəgi nəkwən mier. Nənimen rəmwhen ia meri sə raməhiapw ia rukwəsikər.

17 Nəpɪn iakətoni iəmə nəha iakmwei irapw ia nisun mi rəmwhen iakemhə. Mətə in rəmri pehe

1:13: Dan 7:13, 10:5 **1:14:** Dan 7:9, 10:6, Rev 2:18, 19:12, Rev 14:2 **C 1:14:** Nəgkiarɪen səvəi nəkur Kris ramini iamɪnhi irə mɪnuə “Rəpsan pɪk rəmwhen ia sno.” **1:16:** Hip 4:12, Rev 1:20, Rev 2:12,16, Rev 19:15,21

rəgin mwatuk ia nirak, mini mə, “Tikəpwəh nehekiriēn. Iou iərmama i iakinərə raka kupwən, nənə takarə mwi kurirə.

¹⁸ Iou iərmama i iakamiru. Fwe kupwən iakimamhə, mətə ətə ro təkwtəkwuni iakuvəmiru takimiru ia nuk nuk me. Iou iakasori ia Noien Iərmama Remhə, masori mwi ia Imwei Nəkur Həuvamhə.^d

¹⁹ Ro pen tikaməkeikei mirai pen ia nəkukuə narimnari me i ikamətoni, səməme kamo ipwet mine, mine səməme tuhəuvehe kurirə.

²⁰ Takini pehe tukw ik i nipwrai kəməhau me i irəha pam sefen ikamətə ia rəgik mwatuk mine nipwrai nəri laet raməkure utə irə irəha pam sefen kino ia kol. Kəməhau me nəha sefen irəha nəha nagelo me səvəi nakalasia me səməme kamharə ia taon me nəha sefen. Nənə nəri laet raməkure utə irə irəha pam sefen kino ia kol irəha nəha nakalasia me səməme kamharə ia taon me nəha sefen.”

2

Nəgkiariien ramevən ti nakalasia me fwe Efesas

¹ “Rai nəkukuə riti revən ti agelo səvəi nakalasia me ia taon nəha Efesas, mini pen minuə:

Nəgkiariien i səvəi iərmama sə rauvehi kəməhau sefen ia rəgin mwatuk, nənə, mamavən ia kurkwai nəri laet raməkure utə irə irəha pam sefen kino ia kol.

1:18: Aes 44:6, 48:12, Rev 2:8, 22:13 **d 1:18:** Nəgkiariien səvəi nəkur Kris ramini iamnhi irə minuə “Iou iakauvehi ki me səvəi Noien Iərmama Remhə mine Imwei Nəkur Həuvamhə.” **1:19:** Rev 1:1 **1:20:** Rev 1:16, 2:1, Rev 3:1 **2:1:** Rev 1:16; 20

² Iou iakukurən noien me səkimiāha. Iakukurən mə hiaməmwur pik mamhərer əknekin ia nəpın me. Iakukurən mə hiamərapinhə ia nəkur ərəha. Hiənəkiri noien səvəi nərmama me nəha kamhəni mə irəha aposol me mətə rıpkə mhə irəha pərhiən, nənə, hiənətoni raka mə irəha kamheikuə.

³ Iakukurən mə ia nəpın me kamo nəmisəien m kimiāha ti nəghik, mətə hiamərer əknekin ia nahatətəien səkimiāha mhəpwəh nəpouien.

⁴ Mətə nari riti nəha ikin hiamo rıpkatukwatukw mhə ia nənimek. Kimiāha hiənəpwəh nokeikeiien kupwən səkimiāha.

⁵ Ro iamınhi irə rerimiāha tramrhi nərerien sə hiənərer irə fwe kupwən kurirə hiəmwei. Tihərərig ia noien ərəha me səkimiāha, mho narimnari me nəha sə hiənamo fwe kupwən. Trini minuə hiəpwəh nırərigien ia noien ərəha me səkimiāha, nənə takuvehe tukumiāha muvehi raka səkimiāha nəri laet raməkure utə irə ia təmwhəkin.

⁶ Mətə nari kuatia nəha ikin hiamo ramasan. Kimiāha hiəmwəki noien me nəha nərmama səvəi Nikolas kamho rəmwhen iou mwi iakəmwəki.

⁷ İərmama sə nəkwəregın rarə traməkeikei mətərig amasan ia nəgkiariien me səməme Nənimwın İkinan rani pen ti nakalasia me. İərmama sə triskai meste naruagənien rukurau, iou takəsəni in rəni nukwai nei kauvehi nımıruien irə ramərer ia kwopun nəha Parataes səvəi Kumwesən.”

Nəgkiariien ramevən ti nakalasia me fwe Smana

2:2: Rev 2:19, Rev 3:1,8,15, 1Jon 4:1 **2:5:** Rev 2:16,22, Rev 3:3,19

2:6: Sam 139:21 **2:7:** Jen 2:9, Rev 22:2,14,19

⁸ “Rai nəkukuaḗ riti revən tī agelo səvəi nakalasia me ia taon nəha Smana, mini pen minuə:

Nəgkiariien i səvəi iərmama sə rinarə raka kupwən, nənə trarə mwi kurirə. In remhə mətui mwi.

⁹ Iou iakukurən nəmisəien səkimiaha. Iakukurən mə səkimiaha nautə riwən. (Mətə ia nənimek nautə səkimiaha rasori anan.) Iakukurən nəgkiariien ərəha me nəha nərmama nepwīn kəmhəni ia kimiaha. Irəha kəmhəni mə irəha nəkur Isrel, mətə rekəm. Nəusəsimwinien səvənraha səvəi Setan.

¹⁰ Tihəpwəh nehekiriien nəmisəien i tripkə mħə tui reste kimiaha. Həregi ro. Setan tripkosə pen kimiaha nepwīn ia kalapus mə tro mətə sas ia nahatətəien səkimiaha. Tihəregi nəmisəien ia nəpīn me i irəha pam ten. Kimiaha tihəməkeikei mħərer əknekīn nəri auər a trīni minuə kousi əpune kimiaha, nənə iou takuvei pehe nīmīruien m kimiaha rəmwhen kəfəfau pen kəfəfau amasan ia kənkəpwə iərmama sə rəvtənhi nərmama ia naiuien.

¹¹ Iərmama sə nəkwəregīn rarə traməkeikei mətərig amasan ia nəgkiariien me səməme Nənimwīn Ikinan rani pen tī nakalasia me. Iərmama sə triskai meste naruağəniien rukurau in trəpwəh nemhəien ia nemhəien sə ro kəru irə.”

Nəgkiariien ramevən tī nakalasia me fwe Pəkamam

2:8: Rev 1:17 **2:9:** 2Kor 11:14-15, Jem 2:5, Rev 3:9 **2:10:** Mat 10:28, 2Tim 4:8, Jem 1:12, Rev 3:11 **2:11:** Rev 20:14, 21:8

12 “Rai nəkukuə riti revən tī agelo səvəi nakalasia me ia taon nəha Pekamam, mīni pen mīnuə:

Nəgkiariien i səvəi iərmama sə rauvehi nau səvəi naruagənien rəhiə ia nīkaren pəri mi.

13 Iou iakukurən kwopun hiamarə ikīn. Jea sə Setan raməkure irə mamərimənu in nəha ia kwopun nəha, mətə kīmiaha hiamuvehi əknekīn nəghik ia nəpīn me, mhəpwəh nərkwafəien i mə hiamahatətə ia nirak. Pərhiēn hiəpwəh mwi nərkwafəien i fwe kupwən nəpīn Antipas ramarə ihi. In iərmama riti səiou iakukurən nətīgiteien irə. Rīnərər irapw məgkiari ia nirak kousi əpune in ia taon səkīmiaha, kwopun Setan ramarə ikīn.

14 Mətə narimnari me nepwīn nəha ikīn hi-amo həkpatukwatukw mhə ia nənimek. Kīmiaha me nepwīn kamhəkurirə nahatənien səvəi Palam. Palam nəha in rīnahatən Kig Palak mə in trərhiərhi nəkur Isrel pwəh irəha ho noien ərəha, mhani nəveginien sə kīməuvei pen m nənimwi nari me sə kaməfwaki pen mīnraha, nənə, mhəiri əpnəpen irəha me.

15 Ia noien nəha kīmiaha nepwīn mwi kamhəkurirə nahatənien səvəi nərmama me səvəi Nikolas.

16 Ro iamīnhi irə tihərərīg ia noien ərəha me səkīmiaha. Mə hiəpwəh, trīpko mhə tui iakuvehe tukumiaha, mousi nərmama me nəha, mərai irəha ia nau səvəi naruagənien sə ruku pen ia nīpəgi nəkwak mier.

17 Iərmama sə nəkwəregīn rarə traməkeikei mətərīg amasan ia nəgkiariien me səməme

2:12: Aes 49:2, Rev 1:16 **2:13:** Rev 3:8 **2:14:** Nam 22-24, Nam 25:1-2, Nam 31:16, 2Tes 2:15 **2:17:** Eks 16:4,14-15, Jon 6:48-50, Aes 62:2, Rev 3:12, 19:12

Nənimwɪn Ikinan rani pen tɪ nakalasia me. Iərmama sə trɪskai meste naruaɡənien rukurau takuvehi nəveɡɪnien i ramərkwafə, nəɡhɪn nə mana, muvehi muvei pen min. Nənə takuvei pen mwɪ kəpwier əpsan riti min sə kɪmərəi pen nəhag vɪ irə. Nəhag vɪ nəha nərmama həreirei. Iərmama sə truvehi kəpwier nəha in əpa trukurən.”

Nəɡkiariien ramevən tɪ nakalasia me ia Tuatira

¹⁸ “Rai nəkukuə riti revən tɪ aɡelo səvəi nakalasia me ia taon nəha Tuatira, mɪni pen mɪnuə:

Nəɡkiariien i nəɡkiariien səvəi Tɪni Kumwesən sə nənimen mi krauəhiapw rəmwhen ia napw, nənə nisun mi krouəmwhen ia aean i pras sə kɪnahakwi kahakwi amasan.

¹⁹ Iou iakukurən noien me səkɪmiaha. Iakukurən nokeikeiien səkɪmiaha, mɪne nahatətəien səkɪmiaha, mɪne nasituien sə hiamo m nərmama. Iakukurən mə hiamərer əknekɪn ia nəpɪn me. Iakukurən mə noien amasan me hiamo ipwet mɪne irəha həpɪk mhəpi raka noien amasan me hiənamo fwe kupwən.

²⁰ Mətə nari riti nəha ikin hiamo rɪpkatukwatukw mhə ia nənimək. Kimiaha hiaməsəni noien səvəi pran nəha Jesepel. In rani mə in profet riti, mətə nahatənien səvənhi rameikuə ia iotukwininari me səiou, mamə irəha nərmən mɪne nɪpran kamhəiri əpnəpen irəha me, nənə mamhəni nəveɡɪnien sə kɪməuvei pen m nənimwi nari me səməme kaməfwaki pen mɪnraha.

²¹ Iakeitenhi pran naha mə in trirərig ia noien ərəha səvənhi, mətə in rəpwəh nokeikeiien mə tro iaminha irə.

²² Ro pen, hətoni ro, takuvei pen nemhəien skai riti min, mərarki irapw in raməmisə a ia niməhan səvənhi. Nərmama me naha kamho əpnəpen nari irəha min takərarki pen irəha ia nəmisəien asori. Tako iaminha irə trini minuə irəha həpwəh nirərigien ia noien ərəha me səvəi prən naha.

²³ Nənə nıpwnəti prən naha takousi əpune irəha. Ro iaminhi irə nakalasia me pam tuhəukurən mə iou i iərmama iakamətə pui nətərigien səvəi nərmama mine rerinraha me, nənə takərpwin pehe nərəkuien m kimiaha kuatia kuatia resi pen a noien me səkimiaha.

²⁴ Mətə iakukurən mə kimiaha me nepwin fwe Tuatira hiəpkukurirə mhə nəgkiariien səvəi Jesepel. Hiəreirei nəgkiariien me naha kamini mə, ‘Nəgkiariien anan me səvəi Setan in ramərkwafə ia təkutan.’ Iakani pehe tukumiaha i mə nari pam riti mwi riwən sə takəmri pehe ia kimiaha mə tiho,

²⁵ mətə tihaməkeikei mhəkwtəmhiri əknekın nəri sə hiəuvəuvehi raka meste takuvehe.

²⁶ Iərmama sə triskai meste naruagəniien rukurau, mamə mwi nəfe iakiməni mə tro mevən meste nəpın sampam, iərmama naha takuvei pen nasoriien min, in trasori ia nərmama ia tənəmtənə me.

²⁷ ‘In truvehi nəri skai riti sə rəmwhen ia nep ramahatən pen nasoriien səvəi kig. In tramərimənu ia nirəha, mamətəftəfi irəha

rəmwhen kamousi testesi tekinari me i kīno
ia nise tīprənə.’

28 Nīpərhiēniēn iou takuvei pen nasoriēn min
rəmwhen Tata səiou rīməuvei pehe miou. Nənə
takuvei pen mwi kəməhau i kofətəteia min.

29 Iərmama sə nəkwəregīn rarə traməkeikei
mətərig amasan ia nəgkiariēn me səməme
Nənīmwin Ikinan rani pen tī nakalasia me.”

3

Nəgkiariēn ramevən tī nakalasia me fwe Satis

1 “Rai nəkukuə riti revən tī agelo səvəi nakalasia
me ia taon nəha Satis, mīni pen mīnuə:

Nəgkiariēn i səvəi iərmama sə rauvehi
nənīmwin me səvəi Kumwesən irəha pam sefen,
nənə mauvehi mwi kəməhau me irəha pam
sefen. Iou iakukurən noien me səkimiaha.
Iakukurən mə kani nəghimiaha mə kimiaha
hiaməmīru, mətə rekəm. Kimiaha hiəuvamhə
raka.

2 Hətui rə! Tripko mhə tui noien amasan me
səkimiaha hiənamo fwe kupwən tuhəiwən anan.
Mətə tihaməkeikei mhousari mə tihəuvehi utə mwi
noien me səkimiaha mho həuvehe mhəskai, tī nəri
nə mə iakəpwəh ihi nətoniēn noien amasan riti
sə hiəno mhəuvən mho sampam irə nənə ratuk-
watukw ia nəmri Kumwesən səiou.

3 Ro pen rerimiaha tramrhi nəgkiariēn sə
hiəuvəuvehi raka mhəregi kīnahatən kimiaha irə
fwe kupwən. Tiho nəgkiariēn nəha, mhərərig
ia noien ərəha me səkimiaha. Trīni mīnuə
hiəpwəh nətūiēn, takuvehe tukumiaha rəmwhen

ia rakres, nənə tihəreirei nəfe nəp̄in takuvehe tukumiaha irə.

⁴ Mətə k̄imiaha nepw̄in a nə ia Satis t̄inari s̄əvənraha r̄ipk̄əmkem̄ik mhə ia noien ərəha. Irəha tuhavən irəha miou ia t̄inari əpsan ti nəri nə mə irəha hatukwatukw.

⁵ Iərmama s̄ə triskai meste naruagənien ruku-rau in trarkahu ia t̄inari əpsan, nənə ko iapkuvehi raka mhə nəgh̄in ia nəkukuə s̄əvəi n̄im̄iruien. Ia nəmri Tata s̄əiou m̄ine nəmri nagelo me takini irapw nəgh̄in mə in iərmama riti s̄əiou.

⁶ Iərmama s̄ə nəkw̄əreḡin rarə traməkeikei mətəriḡ amasan ia nəgkiariien me s̄əməme Nən̄imw̄in Ikinan rani pen ti nakalasia me.”

Nəgkiariien ramevən ti nakalasia me fwe Filatelfia

⁷ “Rai nəkukuə riti revən ti agelo s̄əvəi nakalasia me ia taon nəha Filatelfia, m̄ini pen m̄inuə:

Nəgkiariien me i s̄əvəi Iəmə Ikinan, Iəmə s̄ə rani n̄ip̄ərhienien. In rauvehi ki s̄əvəi Kig Tevit. Tr̄ini m̄inuə r̄əsevər ia t̄əpinhə riti, iərmama riti ko r̄ipk̄ərap̄inhə mhə. Nənə tr̄ini m̄inuə in r̄ərap̄inhə ia t̄əpinhə riti, iərmama riti ko r̄ipk̄əsevər mhə.

⁸ Iou iakukurən noien me s̄ək̄imiaha. Hətoni ro. Iak̄in̄əsevər ia t̄əpinhə riti tukumiaha, t̄əpinhə i iərmama riti ko r̄ipk̄ərap̄inhə mhə. Iakukurən mə n̄iskaiien s̄ək̄imiaha rouihi a, mətə hiaməkwtəm̄hiri nəgkiariien s̄əiou, mhəpwəh n̄ərkwaf̄əien mə k̄imiaha n̄ərmama me s̄əiou.

⁹ Hæregi ro. Nærmama me næha ia nousæsîmwîniën sævai Setan hæni mæ iræha nækur Isrel (mætæ rekæm iræha ieikuæ me) iou tako iræha hæuvehe mhænîmwi nukurhunraha ia nisumiaha, mhæsiai kîmiaha, nænæ mhæukuræn mæ iou iakokeikei kîmiaha.

¹⁰ Nænæ ti næri næ mæ kîmiaha hiamækwætæmhiri nægkiariien sæiou, mamhærer æknekîn ia næpîn me, iou mwi takækwætæmhiri kîmiaha, mamaræ tukumi-aha ia næpîn sæ ripko mhæ tui ruvehe nærmama me pam ia tækure tîprænæ tuhæregi næmisæien iræ mæ trætæ sas ia nahatætæien sævænraha.^a

¹¹ Trîpko mhæ tui iakuvehe. Tihækwætæmhiri æknekîn narîmnari me sëmæme hiæuvæuvehi raka mæ iærmama riti træpwæh nakresien nærækuien sækîmiaha sæ hiamaiu tukwe.

¹² Iærmama sæ trîskai meste naruagænien rukurau, iou tako in ræmwhen ia nei skai riti krîpesu nimwæ sævai Kumwesæn sæiou iræ. Nænæ in trîpkier mhæ ia nimwæ næha ia næpîn riti. Nænæ takrai pen næghi Kumwesæn sæiou iræ, mine næghi taon sævai Kumwesæn sæiou iræ. Taon næha in Jerusalem vi sæ truku pen ia neiai meiwaiu pehe. Nænæ takrai pen mwi næghîk vi ia iærmama næha.

¹³ Iærmama sæ nækwæregîn raræ tramækeikei mætærig amasan ia nægkiariien me sëmæme Nænîmwiîn Ikinan rani pen ti nakalasia me.”

3:9: Rev 2:9, Aes 45:14, Aes 49:23, Aes 60:14 **3:10:** Luk 21:19, 2Tim 2:12 **a 3:10:** Suatuk riti mwi ti nîniien nægkiariien

ia vas ten rîni iamînhî iræ mînuæ: “Nænæ ti næri næ mæ kîmiaha hiamækwætæmhiri nægkiariien sæiou, mamhærer æknekîn ia næpîn me, iou mwi takækwætæmhiri kîmiaha, mæpwæh næseniien hiætoni næpîn sæ ripko mhæ tui ruvehe nærmama me pam ia tækure tîprænæ tuhæregi næmisæien iræ mæ trætæ sas ia nahatætæien sævænraha.”

3:11: Rev 2:10,16 **3:12:** Aes 62:2, 65:15, Esik 48:35, Rev 14:1, 21:2

Nægkiariien ramevæn tî nakalasia me fwe Lao-tisia

¹⁴“Rai nækukuæ riti revæn tî agelo sævæi nakalasia me ia taon naha Laotisia, mini pen minuæ:

Nægkiariien i sævæi iærmama i kani nîpærhienien iræ. In iærmama sæ rimæni irapw næfe in rinætoni mîregi nærmama hæukuræn nætigiteien ia nægkiariien sævænhi mæ ro nîpærhienien, nænæ in nukune narimnari me pam sëmæme Kumwesæn rino.

¹⁵ Iou iakukuræn noien me sækimiaha. Iakukuræn mæ kîmiaha hiæmwhen ia nui æreuæn. Hiæpwæh nækwieien mhæpwæh næpnæpanien. Iakuæ ko hiækwie i uæ hiæpnæpan ramasan.

¹⁶ Mætæ kîmiaha hiæreuæn a, mhæpwæh næpnæpanien, mhæpwæh nækwieien. Ro pen takærgavæs raka ia kîmiaha,

¹⁷ tî næri næ mæ hiamæni mæ nautæ sækimiaha rasori, narimnari me pam raræ tukumiaha, tihætui nari riti mwi tî næfe. Mætæ hiæreirei mæ ia nænimek kîmiaha nautæ sævænraha riwæn, nænimemiaha rifwæ, tinari riwæn ia nîpwramiaha, nîmapwmapw me ro kîmiaha, nærmama hætoni kîmiaha rerinraha ramæpou.

¹⁸ Ro iamînhi iræ iakamævæhag m kîmiaha mæ tihamækeikei mhæuvehi næmri aean i kol tukw iou, kol i kosæ pen ia napw rahi raka sæ ræræha mæpwæh sæ ræmher. Tiho iamînhi iræ mæ nautæ sækimiaha trasori. Nænæ tihamækeikei mhæuvehi næmri tinari æpsan me tukw iou, mharkahu iræ, pwæh ruvegi nîpwramiaha sæ ramo naurisien ia næmri

3:14: Rev 1:5, 19:11, Kol 1:15
Hos 12:8, 1Kor 4:8, Luk 12:21

3:15: Rom 12:11, Rev 2:2
3:17: Hos 12:8, 1Kor 4:8, Luk 12:21
3:18: Aes 55:1, Jem 2:5, Rev 3:5, 4:4, Rev 16:15

nərmama. Nənə tihaməkeikei mhəuvehi mwi nəmri nari i ramomasan nəkwai nəmri iərmama, mahakwi nəmrimiaha irə, pwəh nəmrimiaha rətui hiətoni amasan nari.

¹⁹ Nərmama səməme iakokeikei irəha, iakaməgkiari skai minraha, mamərpwi atukwatukw irəha. Ro iamini irə tiho rerimiaha pwəh ruvehe məpnəpan, mapwor, nənə mhərərig ia noien ərəha me səkimiaha.

²⁰ Həregi ro! Iakamərer ia kwəruə, makunkun təpinhə ti nuvniwəien. Trini minuə iərmama riti riregi reri, nənə məsevər ia təpinhə, iou takuvniwə pehe kimrau min trouəni pəri nari.

²¹ Iərmama sə triskai meste naruagəniien rukurau, takəsəni in rəkure kimrau min ia jea səiou rouərimənu. Tako irə rəmwhen kino ia nirak. Iakuvəskai raka ia naruagəniien meste rukurau, nənə təkwtəkwuni iakaməkure kimrau səiou Tata ia jea səvəni rouərimənu.

²² Iərmama sə nəkwəregin rarə traməkeikei mətərig amasan ia nəgkiariien me səməme Nənimwin Ikinan rani pen ti nakalasia me.”

4

Jea riti fwe ia neiai Kumwesən raməkure irə mamərimənu

¹ Iakinətə pam narimnari me i, nənə mətəni pen mətəni təpinhə riti ia neiai raməkwag. Nənə iərmama nəha iakuvəregi raka rerin fwe kupwən rəgkiari pehe mwi miou, rerin rupwinari rəmwhen ia reri kisipw, mini mə, “Utə pehe ia

3:19: 1Kor 11:32, Rev 2:5
Mat 19:28

3:20: Jon 14:23, 1Jon 2:24

3:21:

4:1: Rev 1:1,10

kwopun i. Iakuə takahatən narimnari me səməme tuhəuvehe kurirə pwəh ikətoni.”

² Təkwtəkwni mwi iakətoni vison riti Nənimwɪn rəriari miou. Jea riti kərpwi ramərer ia neiai, Iəmə iti raməkure irə mamərimənu.

³ Iəmə nəha raməkure irə ramser rəmwhen ia kəpwier amasan mi kəru jaspə mine kanilian. Nənə mərarən riti rukuraukurau ia jea səvənhi makuraan rəmwhen ia kəpwier amasan riti emeral.

⁴ Jea me nepwɪn mwi irəha pam twenti-fo hərəer kuraukurau jea nəha. Nəmə asori me irəha pam twenti-fo kamhəkure ia jea me nəha. Tinari me səvənraha həpsan. Ia kənkəpwənraha kəfəfau me səvəi nisaiien kino ia kol.

⁵ Iəmə nəha raməkure ia kurkwən mamərimənu, nouapirien mine karuəruə mine nərkərikien kamharuku pen ia jea səvənhi. Kupwən ia jea səvənhi nərami napw irəha pam sefen kamhəuək. Nərami napw me nəha irəha nənimwɪn me səvəi Kumwesən irəha pam sefen.

⁶ Nənə kupwən ia jea səvənhi nari riti mwi fwe ikin rəmwhen ia təsi, mətə rəmwhen ia klas sə rəriri məmher. Nərimiru me nepwɪn irəha pam kəfə kamhərəer kuraukurau jea səvənhi nukwai nənimenraha həpik ia nɪpwranraha kupwən mine kurirə.

⁷ Nərimiru me nəha sə kupwən irə rəmwhen ia laeon, sə ro kəru irə rəmwhen ia kau, sə ro kahar irə kənkəpwə rəmwhen ia kənkəpwə iərmama, nənə sə ro kəfə irə rəmwhen ia mɪru sə ramivə.

4:2: Sam 47:8, Aes 6:1, Rev 4:9 **4:3:** Esik 1:28 **4:4:** Aes 24:23, Rev 3:18, 6:11 **4:5:** Esik 1:13, Rev 1:4, 8:5, Rev 11:19, 16:18 **4:6:** Esik 1:5-10,22, Esik 10:14

8 Nərimiru me nəha kefə kuatia kuatia tərəginraha me sikis, nənə ia reri tərəginraha me mine təkurenraha nukwai nənimenraha həpik. Nəpin me pam, ia nəpin mine ia ran, irəha həpkapwis mhə ti noskafəien i mə,

“Iəmə ikinan, Iəmə ikinan, Iəmə ikinan,

Iərimənu Kumwesən sə rauvehi niskaiien me pam!

In rinarə fwe kupwən, marə ipwet mine, mamevən meste tripiwən mhə.”

9 Ia nipu nəha, nərimiru me nəha kamhəgnəgini Iəmə sə raməkure ia jea səvənhi mamərimənu. Irəha kamhəsiai in, mamhəni vivi Iəmə sə ramarə ia nuk nuk me. Nəpin irəha kamho iamınhi irə,

10 nənə nəmə asori me nəha twenti-fo heiwaiu mhənimwi nukurhunraha ia nəmri Iəmə sə raməkure ia jea səvənhi mamərimənu. Irəha kamhəsiai Iəmə sə ramarə ia nuk nuk me, mamhərki pen səvənraha kəfəfau me səvəi nisaiien kupwən ia jea səvənhi, mamhoskafə iamınhi irə mə,

11 “Iərimənu mine Kumwesən səkimaha ikamasan pik.

Ikino narimnari me pam,

mesi pen nətərigien səim mo irəha kamharə.

Pwəh nəgnəginiien mine nisaiien mine niskaiien haruvehe tukw ik ia nəpin me.”

5

Kwəti sipsip mine nimwai nəkukuə kinərfe

4:8: Aes 6:2,3, Esik 1:18, 10:12, Rev 1:4,8 **4:9:** Dan 4:34, 6:26, Dan 12:7, Rev 4:2,10 **4:10:** Rev 4:9, Rev 5:1,7,13, Rev 6:16, Rev 7:10,15, Rev 19:4, 21:5

¹ Nənə iakətoni Iəmə sə raməkure ia jea səvənhi mamərimənu in rauvehi nīmwai nəkukuə riti ia rəgin mwatuk. Nīmwai nəkukuə nəha kīmərāi pen nari ia nīkaren pəri mi, nənə kərfe kuvi tərini m sefen.

² Nənə iakətoni agelo riti nəgsen rasori raməgkiari asori mamini irapw mə, “Sin ratukwatukw mə treitehi raka nəri me nəha sefen kīməvi tərini nīmwai nəkukuə irə nənə məsevər ia nīmwai nəkukuə?”

³ Mətə iərmama riti riwən ia neiai, uə ia tīprənə, uə ia reri tīprənə, in ratukwatukw mə ko rəsevər ia nīmwai nəkukuə i kīnərfe mətī pen irə.

⁴ Nənə rerik rərkwəpīr iakasək ti nəri nə mə kīpkətoni mhə iərmama riti ratukwatukw mə ko rəsevər ia nīmwai nəkukuə kīnərfe mətī pen irə.

⁵ Miregi nəmə asori me nəha irəha riti rini pehe tukw iou mə, “Əpwəh nasəkien. Mətoni ro. Iərmama sə rīməkupwən ia kwənəkwws səvəi Kig Tevit, kani nəghin mə ‘Laeon səvəi Juta,’ in ruvəskai raka meste naruagənien rukurau. Ro pen in rukurən nuvehien nīmwai nəkukuə nəha kīnərfe kuvi tərini m sefen məsevər irə.”

⁶ Nənə iakəti pen mətoni kwəti sipsip riti ramərer ipaka ti jea səvəi Iəmə nəha raməkure mamərimənu ia kurkwai nərimiru me nəha kefə mine nəmə asori me nəha twenti-fo. Kwəti sipsip nəha iakətə rəmwhen mə kīnousi əpune raka. Kənkəpati sefen, nənə, nukwai nənimen sefen. Nukwai nənimen me nəha irəha nəha nənimwīn me nəha sefen səvəi Kumwesən in rīnərhi pen

irəha həuvən ia kwopun me ia təkure tīprənə.

⁷ Nənə kwəti sipsip nəha revən ti İəmə sə raməkure ia jea səvənhi mamərimənu, muvehi raka nīmwai nəkukuə nəha kinərfe ia rəgin mwatuk.

⁸ Nəpən ruvehi nīmwai nəkukuə nəha kinərfe, nənə nərimiru me nəha kefə mine nəmə asori me nəha twenti-fo hənimwi nukurhunraha mheiwaiu ia nəmri kwəti sipsip. Irəha pam kamhəuvehi nəri kauəsi kaməni nīpu irə, mamhəuvehi mwi pesin me kino ia kol. Pesin me nəha kamhəuvehi həukuər ia nīmwəkmwəki nari kauvani nīpekən rapein amasan. Nise napw irə rəmwhen ia nəfwakiien me səvəi nərmama me səvəi Kumwesən.

⁹ Irəha kamhoskafə ia nīpu vi riti, mamhəni mə, “Ratukwatukw mə ik tikuvehi nīmwai nəkukuə i kinərfe,
nənə məsevər irə.

Ik ikəmwhen ti nəri nə mə kinousi əpune ik,
nənə nitem sə rinaiu ikuvehi nəmri nərmama me irə, irəha səvəi Kumwesən.

Irəha nərmama səməme haməuku pen ia kwənəkwus me pam, mine nəgkiariien me pam, mine teki nərmama me pam, mine tənəmtənə me pam.

¹⁰ Ik ikino irəha həuvehe mhəmwhen ia kig me mine pris me ia nəmri Kumwesən səkimaha,
nənə irəha tuhərimənu ia tīprənə.”

5:7: Rev 4:2,10 **5:8:** Rev 8:3-4, 14:2, Rev 15:2, Sam 141:2 **5:9:** Sam 33:3, 40:3, Sam 96:1, 98:1, Sam 144:9, Rev 14:3 **5:10:** Eks 19:6, Aes 61:6, Rev 1:6, 20:6, Rev 22:5

¹¹ Nənə iakəti pen mīregi reri nagelo me həpik həpik. Irəha kamhərəer kuraukurau ia Iəmə sə raməkure ia jea səvənhi mamərimənu, mine nərimiru me, mine nəmə asori me. Nagelo me nəha irəha taosen m taosen uə ten-taosen m ten-taosen,

¹² kamhoskafə əpwəmwiś, mamhəni mə,
“Kwəti sipsip sə kinousi əpune, in ramasan pik.

Pwəh niskaiien, mine nautə, mine nukurəniien, mine nərimənuiien, mine nisaiiien, mine nasoriien, mine nəgnəginiiien həuvən tukwe in ia nəpin me.”

¹³ Nənə iakregi narimnari me pam səməme Kumwesən rino ia neiai, ia təkure tīprənə, ia reri tīprənə, ia reri təsi, iakregi narimnari me pam səməme kamharə ia kwopun me nəha kamhoskafə, mamhani nīpu mə,

“Iəmə sə raməkure ia jea səvənhi mamərimənu mine kwəti sipsip,
pwəh nəgnəginiiien, mine nisaiiien, mine nasoriien, mine niskaiien, həuvən ti nirau ia nuk nuk me.”

¹⁴ Nənə nərimiru me nəha kefə həni mə, “Pwəh ro iamīnhi!” Nənə nəmə asori me hənimwi nukurhunraha mheiwaiu, mhəuvei pen nisaiiien səvənraha mīnrau.

6

Kwəti sipsip rəsevər ia nīmwai nəkukuə sə kinərfe

¹ Ia nəpin nəha iakəti pen mətoni kwəti sipsip reitehi raka nəri nəha riti sə kiməvi tərini nīmwai

nəkukuə irə. Meitehi raka pam, nənə iakregi nərımıru me nəha kefə riti rəgkiari rerin rupwinari rəmwhen ia karuəruə mīni mə, “Uvehe!”

² Nənə iakəti pen mətoni hos əpsan riti. Iəmə sə raməkure irə rauvehi nifagə. Kuvei pen kəfəfau səvəi nisaiien min. In rier mamevən rəmwhen iərmama riti sə rinaruagən pam, nənə traruagən mwī muvehi irapw niskaiien səvəi nərməpə.

³ Nənə kwəti sipsip reitehi raka nəri sə ro kəru irə kiməvi tərini nīmwai nəkukuə irə. Meitehi raka pam, nənə iakregi nərımıru me nəha kefə sə ro kəru irə rini mə, “Uvehe!”

⁴ Nənə hos riti mwī ruvehe hos əruerəv. Iərmama sə raməkure irə kuvei pen nau asori riti səvəi naruagənien min. Kinəsəni in mə trevən mo nərmama ia təkure tīprənə haruagən mhousi əpune irəha me.

⁵ Nənə kwəti sipsip reitehi raka nəri sə ro kahar irə kiməvi tərini nīmwai nəkukuə irə. Meitehi raka pam, nənə iakregi nərımıru me nəha kefə sə ro kahar irə rini mə, “Uvehe!” Nənə iakəti pen mətoni hos pitəv riti. Iərmama sə raməkure irə rauvehi nəri sə kaməkiri nari irə.

⁶ Nənə iakregi reri iərmama riti ruku pen ia kurkwai nərımıru me nəha kefə, mamīni mə, “Evən. Kinəsəni ik mə tiko nukumhə ravən ia tənəmtənə me. Nərmama tuhərarki mane asori ti nuvehiiien nəveginien rouihi a. Mətə tikəpwəh nourahaiien nukune nei me nəha olif kamo oel ia nukwan mīne nukune nəkwus me nəha krep kamo waen irə.”

⁷ Nənə kwəti sipsip reitehi raka nəri sə ro kefə irə kiməvi tərini nīmwai nəkukuə irə. Meitehi raka

pam, nənə iakregi nərımıru me nəha kefə sə ro kefə irə rini mə, “Uvehe!”

⁸ Nənə iakəti pen mətoni hos əmrakw riti. Iərmama sə raməkure irə nəghin nə Noien Iərmama Remhə. In riti nəghin nə Imwei Nəkur Həuvamhə rakurirə irə rauevən. Kınəsəni pen nərmama pam ia təkure tıprənə ia rəginrau. İrau troueven rouəvsini irəha kefə kefə, rouo kuatia remhə rouəpwəh kahar kamharımıru. Nepwın tuhemhə ia naruagənien. Nepwın nəveginien triwən ti nirəha hemhə. Nepwın nemhəien truvehi irəha hemhə. Nepwın nəri əprmin me tuhahi əpune irəha.

⁹ Nənə kwəti sipsip reitehi raka nəri sə ro krirum irə kiməvi tərini nımwai nəkukuə irə. Meitehi raka pam, nənə iakəti pen fwe nisui nıfatə pırapw mətoni nərmama səməme kınousi əpune irəha ti nəri nə mə kamhəni irapw nəgkiariien səvəi Kumwesən, mamhəni mə in ro nıpərhienien.

¹⁰ İrəha kamhəkwein əpwəmwis mə, “İərimənu asori. İk İəmə ikinan. İk nıpərhienien. Nərmama ia təkure tıprənə hənousi əpune kimaha. İkafwini mə tinesən ikərpwın pen noien ərəha səvənraha?”

¹¹ İrəha həni iamınha irə, nənə kuvei pen tınari əpsan mınraha kuatia kuatia, kını pen ti nirəha i mə tuhapwis ouihi a mwi meste tukukupwən kousi əpune pam piəvnraha me nepwın mwi səməme hənəmo tukwini pəri nari irəha mınraha fwe kupwən.

¹² Nənə kwəti sipsip reitehi raka nəri sə ro sikis

6:8: Jer 15:1-3, Esik 5:12,17, Esik 14:21, Esik 33:27 **6:10:** Rev 16:7, Dut 32:43, Sam 79:10 **6:11:** Rev 3:18, 7:9,13, Rev 19:14
6:12: Mat 24:29, Wok Me 2:20, Rev 8:12

irə kıməvi tərini nəkukuə irə. Meitehi raka pam, nənə iakəti pen mətoni nımwnımwien asori riti ravən. Meri ruvehe mīpitəv mīpitəv. Məkwə ruvehe məruevəv rəmwhen ia netə.

¹³ Nənə kəməhau me fwe irənhə ia neiai həsas mheiwaiu ia tīprənə rəmwhen ia nei riti nımətəgi asori rikiukiū irə nukwan me həsas.

¹⁴ Kəpuapen ruvehe miwən məmwhen ia nımwai nəkukuə iərmama ruvehi mərfə raka i. Nənə təkuər me mine tənə əmweris me haraka ia təmwhekinraha me.

¹⁵ Nənə kig me ia tīprənə, mine ieni me, mine nəmə asori me səvəi naruagən me, mine nərmama nautə səvənraha rasori, mine nərmama nəgsenraha rasori, irəha mine nərmama pam nəri auər a mə irəha slef uə həpko mhə irəha slef, həuvən ia təkuər me mhərkwafə ia nīpəgi kəpwier me mine reri kəpwier me,

¹⁶ mamhəkwein pen təkuər me mine kəpwier me mamhəni mə, “Tiho mhəsas mhəkure tərini kımaha, mhərkwafə kımaha, pwəh iəmə nəha raməkure ia jea səvənhi mamərimənu rəpwəh nətonien kımaha, pwəh niemaha səvəi kwəti sip-sip rəpwəh nesteien kımaha.

¹⁷ Kwa nəpın asori səvəi niemaha səvənrau ruvəuvehe. Sin nəghin ko rərer irapw?”

7

Agelo rəmri pen mak səvəi Kumwesən ia nəkur Isrel irəha pam 144,000

¹ Kurirə ia narimnari me i iakətoni nagelo me

6:13: Aes 34:4 **6:14:** Aes 34:4, Rev 16:20 **6:15:** Aes 2:10,19,21

6:16: Luk 23:30, Rev 4:2,10 **6:17:** Joel 2:11, Neham 1:6, Mal 3:2

7:1: Jer 49:36, Dan 7:2

kefə kambaherer ia təkure tīprənə i riti ia nīkaren pesu, riti ia nīkaren parei, riti ia nīkaren prehi, riti ia nīkaren peraha. Irəha kambahəkwtəmhiri nīmətagi me pam nəha kefə mə nīmətagi triwən ia təkure tīprənə mine təsi mine nei me.

² Nənə iakəti pen mətoni agelo riti mwi ruku peraha mauvehi nari riti tromak ia nərmama irə trahatən pen mə Kumwesən sə ramiru səvənhi me nərmama me nə irəha. Agelo i rəkwein əpwəmwis nagelo me nəha kefə səməme kinəsəni irəha mə tuhouraha tīprənə mine təsi.

³ In rini pen ti nirəha i mə, “Həpəpim narakaien nīmətagi pwəh rəpwəh nourahaien tīprənə mine təsi mine nei me. Pwəh iako pen raka mak səvəi Kumwesən səkitaha ia nīpwənai iotukwininari me səvənhi me.”

⁴ Nənə iakregi kini nərmama me nəha səməme həuvehi mak səvəi Kumwesən irəha pam wan-hantret-foti-fo-taosən. Nərmama me nəha komak ia nirəha həuku pen pam ia kwənəkwus me səvəi nəkur Isrel.

⁵ Ia kwənəkwus səvəi Juta, nərmama irəha pam twelef-taosən.

Ia kwənəkwus səvəi Rupen, nərmama irəha pam twelef-taosən.

Ia kwənəkwus səvəi Kat, nərmama irəha pam twelef-taosən.

⁶ Ia kwənəkwus səvəi Aser, nərmama irəha pam twelef-taosən.

Ia kwənəkwus səvəi Naftali, nərmama irəha pam twelef-taosən.

Ia kwənəkwus səvəi Manase, nərmama irəha pam twelef-taosən.

- 7 Ia kwənəkwus səvəi Simeon, nərmama irəha pam twelef-taosen.
 Ia kwənəkwus səvəi Livae, nərmama irəha pam twelef-taosen.
 Ia kwənəkwus səvəi Isakar, nərmama irəha pam twelef-taosen.
 8 Ia kwənəkwus səvəi Sepulun, nərmama irəha pam twelef-taosen.
 Ia kwənəkwus səvəi Josef, nərmama irəha pam twelef-taosen.
 Nənə, ia kwənəkwus səvəi Penjamin, nərmama irəha pam twelef-taosen.

Nərmama həpik tinari səvənraha rəpsan

9 Kurirə ia narimnari me i iakəti pen mətoni nərmama həpik ko kəpkəvsini pam mhə irəha. Irəha haməuku pen ia tənəmtənə me pam, mine kwənəkwus me pam, mine teki nərmama me pam, mine nəgkiariien me pam. Kamhərer ia nəmri Iəmə sə raməkure ia jea səvənhi mamərimənu mine ia nəmri kwəti sipsip. Irəha kamharkahu tinari əpsan me, mamhəuvehi nimwai nəmwir me ia rəginraha,

10 mamhəkwein əpwəmwis mamhəni mə,
 “Kumwesən səkimaha sə raməkure ia jea səvənhi mamərimənu
 irau kwəti sipsip, irau nəha krino suatuk ti nuve-
 himiruien kitaha!”

11 Nagelo me pam hərəer kuraukurau ia jea Kumwesən raməkure irə mamərimənu, nənə, mhərəer kuraukurau mwi ia nəmə asori me, mine nərimiru me nəha kefə. Nənə irəha hənimwi nukurhunraha kupwən ia jea səvəi Kumwesən,

mheiwaiu nənimenraha rirapi tīprənə, nənə,
mamhəsiai in,

¹² mamhəni mə,

“Pwəh ro iamīnhi!

Pwəh nini viviiēn, mīne nəgnəginiiēn,

mīne nukurənien, mīne tanak, mīne nisiiāien,

mīne nərīmənuiēn, mīne niskaiēn,

həuvən ti Kumwesən səkītaha ia nuk nuk me.

Pwəh ro iamīnhi!”

¹³ Nənə nəmə asori me nəha riti ia nirəha rəres
iou mə, “Nisimə nəha kamharkahu ia tīnari əpsan
me? Irəha haməuku pəku?”

¹⁴ Miregi iakini mə, “Iəmə asori. Ik a ikukurən.”

Miregi rini mə, “Irəha nərmama me nəha
səməme kamhəier ia nəpīn nəha kiməni mə
truvehe nərmama tuhəregi nəmisiēn irə rasori
pīk anan. Irəha hənaikuas ia tīnari me səvənraha
mho həpsan ia nite kwəti sipsip.

¹⁵ Ro pen irəha kamhərer ia nəmri Kumwesən
sə raməkure ia jea səvənhi mamərimənu. Irəha
həmwhen ia pris me səməme kamho tukwini pen
nari min ia nəpīn mīne ia ran ia nəkwai nimwə
səvənhi. Nənə Kumwesən sə raməkure ia jea
səvənhi mamərimənu in trəuiui irəha nəpīn me
pam.

¹⁶ Nukumhə tīpkahi mhə mwi irəha.

Irəha tuhəpkəkəkwakwa mhə mwi.

Nukwəsikər tīpkənhi mhə irəha,

uə nəpnəpanien asori səvəi meri tīpkənhi
mhə irəha,

17 ti nəri nə mə kwəti sipsip nəha ia kurkwai jea sə Kumwesən raməkure irə mamərimənu in trətui amasan ti nərəha rəmwhen iərmama riti sə ramətui amasan ti sipsip me səvənhi.

In triri irəha mhəuvən ti nəmri nuimiru me. Nənə Kumwesən trirai raka pam nise nəmrinraha.’ ”

8

Kwəti sipsip reitehi raka nəri sə ro sefen irə kıməvi tərini nımwai nəkukuə irə

¹ Nəpin kwəti sipsip reitehi raka nəri sə ro sefen irə kıməvi tərini nımwai nəkukuə irə, nənə kwənamrig fwe ia neiai meste nıpəri aoa riti.

² Nənə iakətoni nagelo me nəha sefen səməme kamhərer ia nəmri Kumwesən ia nəpin me kıməpeki pen kisipw kuatia kuatia mınraha.

³⁻⁴ Agelo riti mwi nəha ikın rauvehi nari riti kınə ia kol. Nəri nəha rukuər ia nımwəkmwəki nari kauvani nıpekin rapein amasan. Kuvei pen nımwəkmwəki nari nəha min mə truvani ia təkure nıfatə nəha kınə ia kol ramərer kupwən ia jea sə Kumwesən raməkure irə mamərimənu pwəh nise napw irə rousəsımwin irəha nəfwakien me səvəi nərmama me pam səvənhi. Ro iamınhi irə agelo nəha ruvehe mərer pen ia nıfatə nəha, muvani nımwəkmwəki nari nəha rıpık, nənə nise napw irə rousəsımwin irəha nəfwakien me səvəi nərmama me səvəi Kumwesən, həutə ia nəmri Kumwesən.

⁵ Nənə agelo nəha ruvehi nukumheəv rauək ia təkure nıfatə, mərki pen i ia nəri nəha in rauvehi

7:17: Sam 23:2, Aes 25:8, Jon 10:11, Rev 5:6, 21:4 **8:1:** Hab 2:20

8:3-4: Rev 5:8, Eks 30:1-3, Rev 9:13 **8:3-4:** Rev 5:8 **8:5:** Lev

16:12, Eks 19:16-19, Rev 4:5, 11:19, Rev 16:18

rukuær, mærariki irapw ia tækure tìprànə i, nənə nouapirien rəhiapw, karuæruə rærkwəpahar, kregi nærkærikian, nimwnimwien ravən.

Kisipw me irəha pam sefen

⁶ Nənə nagelo me nəha sefen səməme kamhəuvehi kisipw kamhəpnəpenə ti nəseien kisipw.

⁷ Nagelo me nəha sə kupwən rəse kisipw səvənhi, nənə aes mine napw mine netə ho a kərapi irə kətəgi irapw ia tìprànə i. Ruæk mahi nìpəri tìprànə, məpwəh nìpərin kəru, nənə mahi nei me nìpərinraha kuatia, məpwəh nìpərinraha kəru, nənə mahi pam nurhi merə me.

⁸ Agelo sə ro kəru irə rəse kisipw səvənhi, nənə nari riti rəmwhen ia tækue asori rauæk kərarki pen ia təmwei təsi. Nənə nìpəri təsi kwatia ruvehe mo netə irə, nìpərin kəru krouamasan.

⁹ Nərimiru me ia təmwei təsi nìpərinraha kuatia hemhə, nìpərinraha kəru kamhəmiru, nənə nìtətə me səməme kamhəiu ia təsi ko koeite irəha pam kuai irəha ia kusen kahar harəmnəmwhen a kusen kuatia ruvehe mərəha kəru krouamasan.

¹⁰ Agelo sə ro kahar irə rəse kisipw səvənhi, nənə kəməhau asori riti rauæk rəmwhen ia kwənhia rier raka ia neiai, meiwaiu məsas pen ia nui aris me mine nəmri nui me, mouraha nìpərin riti məpwəh kəru krouamasan a.

¹¹ Kəməhau nəha nəghin nə Nəfiəien. Nui me nəha reste irəha həuvehe mhəfiə. Nənə nərmama həpik hemhə ti nəri nə mə hənimwi nui əfiə.

¹² Agelo sə ro kefə irə rəse kisipw səvənhi, nənə nari riti ro meri mine məkwə mine kəməhau me ro pen həpwəh nuəkien ia nəpin pekın. Ia ran meri rauək ia nipərın kəru, məpwəh nuəkien ia nipərın kuatia. Ia nəpin məkwə mine kəməhau me kəmhəuək ia nipərın kəru, məpwəh nuəkien ia nipərın kuatia.

¹³ Nənə iakəti pen mətoni mirup riti ramivə irənhə ia nimagouagou. Iakregi ramasək əpwəmwis, mamini mə, “Aueh! Aueh! Aueh! Nagelo mirəhar nəha na tuharəse kisipw me səvənrahar. Trərəha anan tukumiaha nərmama səməme hiamarə ia təkure tıprənə.”

9

¹ Agelo sə ro krirum irə raməse kisipw səvənhi, nənə iakətoni kəməhau riti rukrutə ia neiai mımwei irapw ia təkure tıprənə. Kiməuvei pen ki riti min. Ki nəha səvəi nəsevərien ia nipəg sə rameiwaiu nukunen riwən.

² Kəməhau nəha rəsevər ia nipəg nəha nənə nise napw ruku pen fwe ikin mutə rəmwhen ia nise napw sə rasori pik anan. Meri mine nimagouagou kroupitəv ia nise napw sə ruku pen ia nipəg nəha.

³ Nənə kəmnhəvt me həier raka ia nise napw nəha mheiwiu ia tıprənə. Kiməuvei pen niskaiien mınraha mə tuhəpi nərmama ia nipikinraha, mho nəmisəien mınraha rəmwhen ia mimi nəha skopion sə ramərkou ia tıprənə. ⁴ Kiməni pen ti kəmnhəvt me i mınuə tuhəpwəh nourahaien nurhi mine nei me mine narimnari me səməme

kamhəuverə ia təkure tɪprənə, mətə tuhouraha əpa nərmama me nəha səməme mak səvəi Kumwesən riwən ia nɪpwənanraha.

⁵ Kɪnəsəni irəha mə tuhəpi nərmama mho nəmisəien mɪnraha meste məkwə krirum, mətə tuhəpwəh nəpi əpuneien irəha. Nəmisəien nəha tuhəregi rərəha irə rəmwhen ia nəmisəien səvəi mimi nəha skopion nəpɪn rəpi iərmama riti.

⁶ Ia nəpɪn me nəha nərmama tuhətui suatuk tɪ nemhəien, mətə ko həpkətoni mhə. Tuhokeikei mə tuhemhə, mətə ko həpkemhə mhə.

⁷ Kəmnhəvt me nəha, iakətə irəha həmwhen ia hos me kamhərer mwatuk tɪ naruaɡənien. Ia nukwənenraha kəfəfau me həmwhen ia kəfəfau səvəi nɪsɪaiien kɪno ia kol. Nənimenraha rəmwhen ia nəmri nərmama.

⁸ Nukwənenraha rəpwəmwɪs rəmwhen ia nukwəne pran. Revɪnraha rəhiə rəmwhen ia revɪ laeon.

⁹ Səvənraha karkahu kɪno ia aean kamhəvegi kwənpwenhinraha irə səvəi naruaɡənien. Tərəɡɪnraha kamhəpuk pɪk rəmwhen hos me səməme kamhəvkəkini kat me mamhəiu mamhəuvən tɪ naruaɡənien.

¹⁰ Nɪpɪkɪnraha ro revɪn irə rəmwhen ia nɪpɪki mimi nəha skopion. Nɪskaiien səvənraha tuho nəmisəien m nərmama irə meste məkwə krirum raməmak ia nɪpɪkɪnraha.

¹¹ Səvənraha riti nəha ikin iəmə asori ramərimənu ia nɪrəha. In nə agelo səvəi nɪpəɡ sə rameiwəiu nukunen riwən. Ia nəɡkiariien Hɪpru nəɡhi agelo nəha Apoton. Ia nəɡkiariien

Krik nāghin nā Apolion (nīpwran mā Kārietaha).

¹² Aueh! Nārəhaien kupwən ruvehe muvavən. Mətə aueh, aueh, hətə ro! Nārəhaien kəru mi nəha ikin troupkuvehe mwi.

¹³ Agelo sə ro sikis irə rəse kisipw səvənhi, nənə iakregi reri iərmama riti ruku pen ia nīpəsegi nīfatə nəha kefə sə kino ia kol ramərer kupwən ia Kumwesən.

¹⁴ Reri iərmama nəha rəgkiari m agelo i ro sikis irə sə rauvehi kisipw nəha, mīni pen tukwe in mə, “Fi nari ia nagelo me nəha kefə səməme kīnərihi irəha fwe kupwən kamharə fwe nui aris asori nəha Iufretes.”

¹⁵ Ro iamīnhi irə kifi nari ia nagelo me nəha kefə. Kīnəpnəpenə raka ia nagelo me nəha kamheitenhi aoa nəha, nəpīn nəha, məkwə nəha, mīne nuk nəha, mə tukifi nari ia nīrəha həuvən mhəvsini pam nərmama ia təkure tīprənə, mhəuai irəha ia kusen kahar harəmnəmwhen a, mhousi əpune riti mhəpwəh kəru.

¹⁶ Nənə iakregi kīni mə naruagən me səvənraha səməme kamhəkure ia hos irəha pam tu-hantretmilian.

¹⁷ Ia vison səiou iakətoni hos me nəha mīne nərmama səməme kamhəkure ia hos me. Irəha harkahu ia tinari səvəi naruagənien kino ia aean, mhəvegi kwənpwenhīnraha irə. Tinari me nəha rərueəv, mo plu, makwes. Kənkəpwə hos me nəha həmwhen ia kənkəpwə laeon me. Napw mīne nise napw mīne təpisi ərəha kamharuku pen ia nīpəgi nəkwanraha mamharier

¹⁸ mharousi əpune pam nərmama ia tənəmtənə me ia kusen kuatia mharəpwəh kusen kəru.

¹⁹ Niskaiien səvəi hos me nəha in nəha ia nīpəgi nəkwənraha mīne nīpikinraha, ti nəri nə mə nīpikinraha rəmwhen ia snek sə ro kənkəpwə ia nusvenhīn. Ia nīpikinraha me ho nəmisəien m nərmama.

²⁰ Mətə nərmama me i səməme nərpwīnien mirəhar nəha harəpwəh nousi əpuneien irəha, irəha həkəpwəh mhə kumwesən eikuə me nəha həno ia rəginraha. Irəha kamhəmwur pen a mamhəfwaki pen m nəremhə me mīne nənimwi nari me səməme kīno ia kəruətərei mīne nei, kīno mwi ia aean me i kol, silva, mīne pras. Irəha nənimwi nari me a. Həkətəni mhə nari, mhəpkregi mhə nari, mhəpkavən mhə.

²¹ Nərmama me i həkəpwəh mhə noien ərəha me nepwīn mwi səvənraha. Mətə kamhəmwur pen a mamhousi əpune nərmama, mamho nəhak mīne noien səvəi klepa, mamhakres, irəha nərman mīne nīpran kamhəiri əpnəpen irəha me.

10

Agelo sə rauvehi kwəti nimwai nəkukuə riti kīnərfə

¹ Nənə iakətəni agelo riti mwi nəgsen rasori rukrutə ia neiai meiwaiu pehe. Nəpuə riti ruvegi nīpwrən. Mərarən riti rukuraukurau ia kənkəpwə. Nənimen raməhiəpw rəmwhen ia meri. Nīsun mi krouəmwhen ia pos asori mi krauuək.

9:20: Rev 16:9,11, Aes 2:8,20, 1Kor 10:19-20, Sam 115:4-7, Sam 135:15-17, Dan 5:23

² Kwæti nīmwai nəkukuə riti sə kīnərfe raməmak ia rəgīn. In ruvi atukw i, mərpwī pəri nīsun mī mwatuk ia təsi nənə nīkaren mour ia tīprənə,

³ marə məkwein əpwəmwīs, rerīn rəmwhen ia laeon sə ramasək asori. Nəpīn rəkwein iamīnhi, karuəruə rərkwəpahar m sefen.

⁴ Karuəruə rərkwəpahar raka m sefen, iakəpnəpenə mə takrai pen ia nəkukuə nəgkiariien sə rani, mətə iakregi reri iərmama riti rukrutə ia neiai mamīni mə, “Ərkwafə ia nəgkiariien i karuəruə rani, məpwəh nīrai penien ia nəkukuə.”

⁵ Nənə agelo sə iakətoni ramərer pen ia təsi mīne tīprənə ruvehi utə rəgīn mwatuk mahatən pen fwe ia neiai,

⁶ mīni mə, “Kumwesən ramarə ia nuk nuk me. In rino neiai, tīprənə, təsi, mīne narimnari me pam səməme kamharə ia nīrəhar. Iakani kwəsua hi ia nəghīn mə nəpīn ruvəkwa kwa. Kumwesən ko rīpkəfwīni mhə mwi,

⁷ mətə nəpīn agelo sə ro sefen irə trəse kisīpw səvənhi, nəgkiariien nəha Kumwesən rīnərkwafə nīpwran truvehe mukuə rosi in rīmāni pen ti iotukwininari me səvənhi profet kupwən me.”

⁸ Nənə iakregi mwi reri iərmama nəha ruku pen ia neiai mani pehe tukw iou i mə, “Evən muvehi nīmwai nəkukuə nəha sə kīnərfe raməmak ia rəgi agelo nəha ramərer pen ia təsi mīne tīprənə.”

⁹ Ro iamīnhi irə iakevən mərəs pen agelo nəha mə truvei pehe miou nīmwai nəkukuə ouihi nəha sə kīnərfe. In rīni pehe tukw iou i mə, “Tikuvehi

10:4: Dan 8:26, Dan 12:4,9 **10:5:** Dut 32:40, Dan 12:7 **10:6:** Neh 9:6, Sam 146:6 **10:7:** Dan 9:6,10, Amos 3:7 **10:9:** Esik 2:8; 3:1-3

māni. Trouaha tipwim, mətə ia nəkwam tikregi rəsien rəmwhen ia sukapak.”

¹⁰ Nənə iakuvehi raka nimwai nəkukuə ouihi nəha sə kinərfe ia rəgi agelo, māni. Iakamāni miregi ia nəkwak rəsien rəmwhen ia sukapak, mətə nəp̄in iakətigai pam, nənə iakregi tipwik ruvehe mərəha.

¹¹ Nənə kini pehe tukw iou i mə, “Tikaməkeikei mægkiari mwi rəmwhen ia profet, mini irapw nəfe treste nərmama həp̄ik, nərmama ia teki nərmama səpəmsəpə, mine kwənəkwas me səpəmsəpə, mine nəgkiariien me səpəmsəpə, mine kig me.”

11

Iəmā mi kəru krouərer irapw t̄i nəgkiariien pərhien

¹ Ia nəp̄in nəha kuvei pehe nari riti miou rəmwhen ia nig kauvehi mak səvəi nari irə, nənə kini pehe tukw iou i mə, “Evən muvehi mak səvəi nimwə səvəi Kumwesən mine nifatə səvənhi, məvsini nərmama səməme kamhəfwaki fwe ikin.

² Mətə tikəpwəh nuvehien mak ia n̄ikare nimwə nəha iruə. Tikəpwəh nuvehien mak səvənhi, t̄i nəri nə mə kuvəuvei pen raka kwopun nəha m nərmama həreirei Kumwesən,^a nənə irəha tuheivə testesi taon ikinan səvənhi meste məkwə foti-tu.”

³ Iou takərhi pen iərman mi kəru səiou səməmi krouərer irapw tukw iou. Iəmā mi nəha

11:1: Esik 40:3, Sek 2:1-2 **11:2:** Luk 21:24, Rev 12:6, 13:5

^a **11:2:** Nərmama həreirei Kumwesən. Suatuk riti mwi t̄i n̄inien nəgkiariien nəha in i mə “Nərmama ia tənəmtənə me” uə “Nərmama r̄ipko mhə irəha nəkur Isrel.”

trouarkahu tinarī sə rahatən pen mə krauasək ti nərəhaien, nənə rouarə rouəvisau irapw nəgkiariien sə takuvei pen minrau meste nəpin irəha pam wan-taosən tu-hantret-sikisti.

⁴ Irau nəha nukune nei mi olif, mine nəri mi laet raməkure utə ia niraui səməmi krouərer ia nəmri Kumwesən Iərimənu səvəi tīprənə.

⁵ Trīni minuə iərmama riti raməmwur mə trouaha irau, nənə nərami napw truku pen ia nīpəgi nəkwanrau mier mahi əpune nərmama səməme haməmwəki irau. Iərmama sə raməmwur mə trouaha irau traməkeikei memhə iaminha irə.

⁶ Iəmə mi nəha krauvehi nīskaiien ti nəsisəgien ia nəpuə mə nesən trəpwəh nauəriən nəpin irau krauni irapw nəgkiariien me səvəi Kumwesən. Irau krauvehi mwi nīskaiien ti nuvsiniien nui me həuvehe mhə netə ia nīrəha, nənə rouukurən mwi nuvehi peheien nemhəien me səpəmsəpə həuvehe mhouraha nərmama ia təkure tīprənə i. Irau krouukurən noien narimnari me nəha ia nəpin me a rəmwhen mə irau kraukeikei.

⁷ Nəpin irau krouni irapw pam raka nəgkiariien səvənrau, nənə nərimiru fwe ia nīpəg sə rameiwaiu nukunen riwən, in trukrirapw mutə maruagən minrau, muvehi irapw nīskaiien səvənrau, mousi əpune irau.

⁸ Nīpwrənrau mi trouəmak ia suatuk səvəi taon asori nəha, kwopun nəha kīnəruī tərini pen Iərimənu səvənrau ia nei kamarkuauī ikin. Kīməuvsini nəghi taon nəha kīni mə “Sotom” uə “Ijip” ramahatən pen nərəhaien ia kwopun nəha.

11:4: Sek 4:3,11-14 **11:5:** 2Saml 22:9, 2King 1:10, Sam 97:3, Jer 5:14 **11:6:** 1King 17:1, Eks 7:17-20, 1Saml 4:8 **11:7:** Dan 7:21, Rev 12:17, Rev 13:1,7, 17:8 **11:8:** Luk 13:34

⁹ Nənə nərmama səməme haməuku pen ia teki nərmama me səpəmsəpə, mine nəgkiariien me səpəmsəpə, mine kwənəkwus me səpəmsəpə, tuhəspau ia nīpwrānrau meste nəpīn kahar mine nīpərin, nənə, kīpkəsēni mhə nīpwrānrau mə tukīnimwi.

¹⁰ Nərmama me ia təkure tīprənə tuhagien pəri, mho lafet, mhəriari pen narimnari amasan me mīnraha me, ti nəri nə mə profet kəru nəha səmami krīno nəmīsəien asori m nərmama ia təkure tīprənə krouvamhə.

¹¹ Mətə nəpīn kahar mine nīpərin ruvehe mukurau, nənə iakətoni Kumwesən ruvei pen nīmīruien mīnrau kroueiahag mwi rouərer ia nisunrau. Nənə nərmama me pam səməme hətōni irau həhekīr asori.

¹² Nənə irəha həregi reri iərmama riti rupwinari ruku pen ia neiai mīni pen ti nīrau i mə, “Rouutə pehe i.” Nənə nəpuə riti ruvehi irau mutə mevən ia neiai. Nərmama səməme kamhəmwəki irau kamhərer mamhətōni irau krautə.

¹³ Ia nəpīn nəha təkwtəkwuni a mwi nīmwnīmwiien asori riti ravən, makiə fifi nari ia kwopun kuatia ia taon nəha, məpwəh kwopun naen hamasan. Nīmwnīmwiien ravən nərmama sefen taosen hemhə. Nərmama me pam səməme həpkemhə mhə həhekīr mhətəmnīmwin, mhəuvehi utə nəghi Kumwesən sə ramarə ia neiai.

¹⁴ Aueh, nərəhaien sə ro kəru irə ruvehe muvavən! Mətə aueh, hətə ro, nərəhaien sə ro kahar irə tīpko mhə tui ruvehe!

Agelo sə ro sefen irə rəse kisipw səvənhi

¹⁵ Agelo sə ro sefen irə rəse kisipw səvənhi, nənə iakregi nərmama nepwin fwe ia neiai kamhəgkiari rerinraha rupwinari mamhəni mə,

“Nərimənuien kamərimənu irə ia təkure tıprənə i təkwtəkwuni ruvehe məmak ia rəgi Kumwesən səkitaha mine Kristo səvənhi.

Nənə in trərimənu ia nuk nuk me.”

¹⁶ Nənə nəmə asori me nəha twenti-fo səməme kamhəkure ia jea me səvənraha ia nəmri Kumwesən hənimwi nukurhunraha mheiwaiu, mhəuvei pen nisaiien səvənraha revən tukwe,

¹⁷ mamhəni mə,

“Iərimənu Kumwesən sə rauvehi niskaiien me pam.

Ik ikinarə fwe kupwən muvehe meste mwi ipwet mine.

Kimaha iahaməni tanak tukw ik,

ti nəri nə mə ikiməuvehi niskaiien asori səim, nənə minamərimənu nəha təkwtəkwuni.

¹⁸ Nərmama ia tənəmtənə me niemaha rəpi pık irəha,

mətə niemaha asori səim ruvəuvehe.

Rino nəpin səim tikəkiri nərmama səməme həuvamhə,

mərəku pen səim iotukwininari me, profet me mine nəkur ikinan me, mine nərmama me pam səməme kamhəsiai nəghim,

nəri auər a mə irəha kamhəuvehi nasoriien uə həpkuvehi mhə nasoriien.

11:15: Eks 15:18, Sam 10:16, Dan 2:44, Obad 21 **11:16:** Rev 4:4,10 **11:17:** Rev 1:4,8, 15:3 **11:18:** Sam 2:1, 46:6, Rom 2:5, Rev 10:7, 19:5, Sam 115:13

Nənə rino nəpɪn səim tikouraha nərmama me nəha səməme kamhouraha nari ia təkure tɪprənə.”

¹⁹ Ia nəpɪn nəha kəsevər ia nimwə səvəi Kumwesən fwe irənhə ia neiai. Ia nəkwai nimwə nəha kətoni pokis səvəi nəgkiariien i Kumwesən rinərihi tərini əknekɪn. Nənə nouapɪrien rəhiapw, karuəruə rərkwəpahar, kregi nərəkərikien, nimwnimwien ravən, aes rəsas rəmwhen ia nesən asori.

12

Pran riti mine snek asori riti

¹ Nənə kətoni nimtətien asori riti rier irapw fwe ia nimagouagou. Pran riti rarkahu ia meri rəmwhen ia tɪnari səvənhi, mərpwi utə nisun mi ia məkwə, nənə məfəfau ia kəfəfau riti səvəi nisaiien kino pen kəməhau twelef irə.

² Prən nəha ramregi nəmisəien mamasək əpwəmwis ti nəri nə mə rino tɪpwɪn na trərəhi tɪni.

³ Nənə nimtətien riti mwi rier irapw ia nimagouagou. Iakətə snek asori riti rəruev. Kənkəpwə irəha pam sefen. Kənkəpati irəha pam ten. Nənə kəfəfau pen kəfəfau səvəi nisaiien ia kənkəpwə me.

⁴ Nɪpikɪn reiesi raka kuse kəməhau riti məpwəh kusen kəru. Səməme nəha nɪpikɪn reiesi raka irəha həsas ia təkure tɪprənə. Nənə snek asori nəha revən mərəer kupwən ia pran nəha na trərəhi iəkunouihɪ mə nəpɪn tɪni trətui snek asori nəha trəni.

11:19: Hip 9:4, Rev 8:5, 15:5, Rev 16:21

12:2: Maeka 4:10

12:3: Dan 7:7

⁵ Præn naha rəræhi tini iərman. In iərman sə truvehi nəri skai rəmwhen ia nep ramahatən pen nasoriien səvæi kig, rauvehi mamərimənu ia nərmama ia tənəmtənə me pam. Nəpɪn tini præn naha rɪnətui raka, nənə Kumwesən ruvehi in, muvehi utə irənhə ia jea səvənhi mə trərimənu.

⁶ Nənə præn naha rap mevən fwe kwopun akwesakwes. Kwopun riti fwe ikin Kumwesən rɪnəpnəpenə raka ti præn naha mə trarə ikin. Tukətui amasan tukwe ia kwopun naha keste nəpɪn wan-taosen tu-hantret-sikisti.

⁷ Nənə naruagənien riti rɪskəmter fwe ia neiai. Mikael mine nagelo me səvənhi kənamhousi snek asori, nənə snek asori mine nagelo me səvənhi kənamhousi mwi irəha.

⁸ Mətə Mikael mine nagelo me səvənhi həuvehi irapw nɪskaiien səvæi snek asori. Kwopun riti səvənraha riwən mwi fwe ia neiai.

⁹ Kuvehi snek asori naha kərarki irapw pehe ia təkure tɪprənə. In snek tui kani mə Iəremhə uə Setan sə rameikuə ia nərmama ia tənəmtənə me pam. Kərarki irapw in irəha nagelo me səvənhi heiwaiu ia təkure tɪprənə.

¹⁰ Nənə iakregi iərmama riti fwe ia neiai rerɪn rupwinari, mɪni mə,

“Təkwtəkɰuni naha Kumwesən səkɪtaha truvehimɪru kɪtaha!

Təkwtəkɰuni naha in tro sətɔni mə in rauvehi nɪskaiien, nənə, təkwtəkɰuni naha in ramərimənu!

Nənə təkwtəkɰuni naha Kristo səvənhi tro sətɔni mə in rasori ia narɪmnari me pam!

Ro iam̄nhi irə ti nəri nə mə Setan sə rani ərəha
 piəvtaha me ia nəp̄in mine ia ran ia nəmri
 Kumwesən,
 kinərarki irapw in ia neiai.

11 Piəvtaha me hənaruagən raka irəha min,
 mhəuvehi irapw niskaiien səvənhi ia nite
 kwəti sipsip,
 mhəuvehi irapw mwi niskaiien səvənhi ti nəri
 nə mə hani irapw nəgkiariien pərhiēn.
 Irəha həkokeikei pik mhə nimiruiēn
 səvənraha,
 mətə hənərər mwatuk a ti nemhəien.

12 Ro iam̄nhi irə, ik neiai mine nərmama səməme
 kamharə ia niram tiho mhagien!

Mətə aueh ik t̄iprənə mine təsi! Tirouregi rərəha
 anan ti nəri nə mə Setan r̄ineiwaiu pehe
 tukumirau!

Niemaha raməpi pik in ti nəri nə mə rukurən mə
 nəp̄in səvənhi ruvəkwakwa.”

13 Nəp̄in snek asori nəha rətoni mə kinərarki
 irapw in ia təkure t̄iprənə, nənə r̄inaripwi prən
 nəha sə r̄inərəhi tini iərman.

14 Mətə kuvei pen tərəgi mirup kəru m prən nəha
 mə trivə irə mevən fwe imwəni ia kwopun ak-
 wesakwes. Tukamətui amasan tukwe ia kwopun
 nəha keste nuk kahar mine n̄ipər̄in mə snek asori
 trəpwəh nourahaiēn in.

15 Snek asori nəha r̄iruai nui asori riti ia tərhun
 rəmwhēn ia iapiwən mə trukurirə pen prən nəha,
 muvehi map.

¹⁶ Mætə tɪprənə rasitu ia pran nəha, meitehi, mətɪgai pam nui sə snek asori ruvəruai irə ia tərhun.

¹⁷ Ro pen snek asori niemaha rəpi anan ti pran nəha. In rəpwəh in mevən mə traruagən irəha kwənəkwus me nepwɪn səvənhi. Irəha nəha nərmama səməme kamho nəgkiariien me səvəi Kumwesən mine nəgkiariien Iesu rɪməni irapw mə ro nɪpərhiien.

¹⁸ In revən mərəer ia nɪkare təsi.

13

Nərimɪru riti sə rukrirapw ia reri təsi mutə

¹ Iakətoni nərimɪru riti rukrirapw ia reri təsi mutə. Kənkəpati me irəha pam ten. Kənkəpwə me irəha pam sefen. Nənə kəfəfau pen kəfəfau səvəi nɪsiaiien ia kənkəpati me. Kimərai pen nəhag me ia kənkəpwə me kuatia kuatia, nəhag me səməme kamhəni ərəha Kumwesən.

² Nərimɪru nəha rəmwhen ia pusi asori nəha kani mə lepet. Nɪsun me həmwwhen ia nərimɪru nəha kani mə pea. Nɪpəgi nəkwən rəmwhen ia nɪpəgi nəkwai laeon. Nənə snek asori nəha ruvei pen nɪskaiien səvənhi min. In ruvei pen mwɪ jea sə in raməkure irə məmərimənu mine nasoriien sə rasori m nərimɪru nəha.

³ Kənkəpwə nərimɪru nəha riti iakətoni mə kɪnəpi əpune raka, mətə rarə mɪmɪru mwɪ təmwki nau ruvehe mɪnamə. Nərmama me pam ia təkure tɪprənə nənimenraha rier tukwe, nənə həkurirə nərimɪru nəha.

⁴ Irəha pam hənimwi nukurhunraha ia nəmri snek asori, mhəsiyai in, ti nəri nə mə in ruvei pen nasoriien səvənhi m nərimiru nəha. Irəha hənimwi mwi nukurhunraha ia nəmri nərimiru nəha, mhəsiyai in, mhəni mə, “Sin rəmwhen ia nərimiru nəha? Sin rukurən naruağənien irau min?”

⁵ Kinəsəni nərimiru nəha minuə trəgkiari ərpwi mini ərəha Kumwesən. Kiməuvei pen nasoriien min in rukurən noien nəfe nəğhin in rokeikei mə tro meste məkwə foti-tu.

⁶ In rani ərəha pik Kumwesən, mine nəğhin, mine imwəni fwe ia neiai, mine nərmama səməme kamharə ikin.

⁷ Kinəsəni in mə traruagən irəha nərmama me səvəi Kumwesən muvehi irapw niskaiien səvənraha. Nənə kiməuvei pen mwi nasoriien min mə trərimənu ia nərmama me pam, nərmama səvəi kwənəkwus me pam, mine teki nərmama me pam, mine nəgkiariien me pam, mine tənəmtənə me pam.

⁸ Nərmama me pam ia təkure tiprənə səməme nəğhinraha riwən ia nəkukuə səvəi nimiruien tuhənimwi nukurhunraha ia nəmri nərimiru nəha mhəsiyai in. Fwe tui nəpən tiprənə ramiwən ihi kuvərai pen raka nəğhi nərmama ia nəkukuə nəha səvəi kwəti sipsip sə kinousi əpune.

⁹ Iərmama sə nəkwəregin rarə traməkeikei mətərig amasan.

¹⁰ Iərmama sə kimərifi mə trevən ia kalapus traməkeikei mevən.

13:5: Dan 7:8,25, Dan 11:36, Rev 11:2 **13:7:** Rev 11:7 **13:8:**
 Sam 69:28, Rev 3:5, 5:6, Rev 17:8, Rev 20:12,15, Rev 21:27 **13:10:**
 Jer 15:2, 43:11, Mat 26:52, Rev 14:12

Iærmama sə kɪmərʃi mə tukərai əpune ia nau səvəi
naruagəniən,
tukaməkeikei kərai əpune.

Ti nəri nə mə tro iamɪnhi irə mɪne ro pen nærmama
me səvəi Kumwesən tuhaməkeikei mhərer
əknekin ia nahatətəien səvənraha ia nəpɪn me.

Nərimɪru riti sə rukrirapw ia reri tɪprənə mutə

¹¹ Nənə iakətoni mwi nərimɪru riti mwi
rukrirapw ia reri tɪprənə mutə. Kənkəpati kəru
krouəmwhen ia kwəti sipsip riti. Rəgkiari rerɪn
rəmwhen ia snek asori riti.

¹² Nərimɪru sə rɪməkupwən muvehe ruvei pen
nasoriien me pam səvənhi mɪn. Ramərer ia nəmri
nərimɪru sə rɪməkupwən muvehe, maməkeikei m
nærmama me pam ia təkure tɪprənə mə tuhənɪmwi
nukurhunraha ia nənimen mhəsiai nərimɪru sə
rɪməkupwən muvehe kɪnəpi əpune kənkəpwə
riti mətə rarə mɪmɪru mwi təmwiki nau ruvehe
mɪnamə.

¹³ Nərimɪru sə rɪməkurirə muvehe ramə
nɪmtətien asori me, mɪni napw rukrutə ia nei
meiwaiu pehe ia tɪprənə ia nəmri nærmama.

¹⁴ In ramərer ia nəmri nərimɪru sə rɪməkupwən
muvehe mamə nɪmtətien me kɪnəsəni pen in mə
tro. Ia noiən nəha in reikuə ia nærmama me
səməme kamharə ia təkure tɪprənə mamɪni pen ti
nirəha i mɪnuə tuhaməkeikei mhəuvrəkɪn nari
riti mhəuvnhi nərimɪru sə kɪnəpi əpune in ia nau
mətə rarə mɪmɪru mwi.

¹⁵ Nənə nəri nəha kɪməuvnhi nərimɪru nəha
irə kəsəni nərimɪru sə rɪməkurirə muvehe mə
treiahag pen irə pwəh rəgkiari. Nənə nənimwi nari

nəha rəgkiari skai miini mə tukaməkeikei kousi əpune nərmama me pam səməme həpkinimwi mhə nukurhunraha ia nənimen mhəsiai in.

¹⁶ Nənə in raməkeikei m nərmama me pam, nərmama kamhəuvehi nasoriien mine nərmama həpkuvehi mhə nasoriien, nərmama nautə səvənraha rasori mine nərmama nautə səvənraha riwən, nərmama kamoslef ia nirəha mine nərmama kipko mhə slef ia nirəha. In raməkeikei minraha mə tuhəuvehi mak riti ia rəginraha mwatuk uə ia niwənanraha.

¹⁷ Mak nəha in nəha nəghi nərimiru nəha uə nampa sə ramahatən nəghin. Trini minuə iərmama riti mak nəha riwən irə, ko riwəvehi mhə nəmri nari riti, məpwəh nəmri penien nəmri nari ia nari riti.

¹⁸ Ro iamihhi irə tikaməkeikei mo nukurəniien səim rəpwəmwis mwi ti nukurəniien nampa səvəi nərimiru nəha. Nənə trini minuə nukurəniien səim rəmwhen tikukurən niniien niwran. Nampa nəha sikis-hantret-sikisti-sikis, ramahatən iərmama riti.

14

Kwəti sipsip mine səvənhi nərmama me irəha pam 144,000

¹ Nənə iakəti pen fwe ia təkuər Saeon, mətoni kwəti sipsip ramərer ia təkuren, nərmama wan-hantret-foti-fo-taosen kamhərer irəha min. Kimərai pen nəghi kwəti sipsip mine Tata səvənhi ia niwənanraha.

² Nənə iakregi reri iərmama riti fwe ia

neiai ramægkiari, rerin rəmwhen ia nui sə ramivə mamierig, məmwhen mwi ia karuəruə ramərkwəpahar asori. Reri iərmama nəha iakregi rəmwhen ia nərmama me i kamhəuəsi nəri kauəsi kaməni nīpu irə. ³ Irəha kamhərer kupwən ia jea sə Kumwesən raməkure irə mamərimənu ipaka ti nərimiru me nəha kefə mine nəmə asori me nəha twenti-fo, mamhani nīpu vi riti. Iərmama riti rīpkukurən mhə nīpu nəha, nərmama me a nəha irəha wan-hantret-foti-fo-taosen səməme Kumwesən rīfi nari ia nirəha mīpeki raka irəha ia təkure tīprənə, irəha həkukurən.

⁴ Irəha i nərmama me i səməme hənatuakəm amasan, mhəmher, ti nəri nə mə həpkiri raka mhə pran. Irəha nərmama vi a. Irəha kamhəkurirə kwəti sipsip mamhəuvən ia kwopun me pam in ramevən ikin. Nərmama me pam, mətə kifi nari ia nirəha i, kīpeki raka irəha həmwhen ia kwənkwai nei kukupwən kesi kuvehi pen m Kumwesən mine kwəti sipsip.

⁵ Nənə ia tərhunraha kīpkətə mhə neikuəien riti ti nəri nə mə irəha hatukwatukw pam.

Nagelo me kahar

⁶ Nənə iakətoni mwi agelo riti mwi ramivə irənhə ia nīmagouagou mauvehi nəgkiariien amasan riti sə ramarə rerin trəvisau irapw i m nərmama səməme kamharə ia təkure tīprənə, nərmama səvai tənəmtənə me pam, mine kwənəkwas me pam, mine nəgkiariien me pam, mine teki nərmama me pam.

⁷ In rægkiari rerin rupwinari mini mæ, “Hæsiai Kumwesæn, mhægnægini in, ti næri næ mæ næpin atukwatukw sævænhî ruvæuvehe mæ trærpwin noien me sævæi nærmama. In rino neiai mine tiprænæ mine tæsi mine næmri nui me. Kimiaha tihamækeikei mhænîmwi nukurhumiaha me ia nænîmen mhæsiai in.”

⁸ Agelo riti sæ ro kæru iræ rukuriræ mwi agelo næha, muvehe, mamini mæ, “In ruvæmwei! Taon asori næha Papilon ruvæmwei! Taon næha ræmwhen ia pran riti sævæi suatuk rivi nærmama ia tænæmtænæ me pam hæuvehe mhænîmwi waen iræha min. Waen næha sænmwîn in næ noien æræha sæ nærman me kamho iræha min.”

⁹ Nænæ agelo riti mwi sæ ro kahar iræ, rukuriræ pen mwi irau, rini nægkiariien i rerin rupwinari mæ, “Trini minuæ iærmama riti rinîmwi nukurhun mi ia næmri nærimîru mine næri kuvrhækîn kuvnhi nærimîru iræ, mîsiai in, muvehi mak sævænhî ia nipwænan uæ rægîn,

¹⁰ niemaha sævæi Kumwesæn treste in. Niemaha næha ræmwhen ia waen riti sæ riskai pik Kumwesæn ruvi pen ia kap sævænhî muvehi pen m iærmama næha rænîmwi. Nænæ in triregi næmisæien ia napw mine tæpisi æræha, trouahi in ia næmri nagelo iki-nan me mine kwæti sipsip.

¹¹ Nise napw sæ ramo næmisæien minraha rautæ ia nuk nuk me. Nærmama me i sæmæme hænîmwi nukurhunraha ia næmri nærimîru, mhænîmwi mwi nukurhunraha ia næmri næri kuvrhækîn kuvnhi nærimîru iræ, mhæsiai in, uæ sin næghîn

14:7: Rev 10:6 **14:8:** Aes 21:9, Jer 51:7,8, Rev 17:2, 18:2,3 **14:9:** Rev 13:12-17 **14:10:** Jen 19:24, Sam 11:6, 75:8, Aes 51:17,22, Jer 25:15, Esik 38:22, Rev 15:7, 16:19, Rev 19:20, 20:10, Rev 21:8
14:11: Aes 34:10, Rev 13:12-17, Rev 19:3

ruvehi mak sə rahatən nəghi nərimiru, irəha tuharegi nəmisəien ia nəpın mine ia ran mhəpwəh napwisien.”

¹² Tı nəri nə mə tro iamınhi irə mine ro pen nərmama me i səvəi Kumwesən kamho nəgkiariien me səvənhi, nənə mamhahatətə ia Iesu, tuhaməkeikei mhərer əknekın ia nəpın me.

¹³ Nənə iakregi reri iərmama riti ruku pen ia neiai mını mə, “Rai pen nəgkiariien i ia nəkukuə: Ipwet mine mamevən trını mınıuə nərmama me səvəi Iərimənu hemhə rerınraha tragien.”

Nənə Nənimwın Ikinan rını mə, “Ouəh pərhien. Irəha tuhapwis mhəpwəh mwi nəmwurien tı nəri nə mə noien amasan me səvənraha tuhəkurirə pen irəha.”

Kumwesən treivə testesi nərmama rəmwhen kamo ia tıpwe krep sə rimarei

¹⁴ Iakəti pen mətoni mwi nəpuə riti rəpsan nənə iərmama riti raməkure utə ia nəpuə nəha. Iərmama nəha rəmwhen ia iəməti iərmama riti. In raməfəfau ia kəfəfau səvəi nisaiien kınə ia kol, mauvehi nau ikou riti rəhiə.

¹⁵ Nənə agelo riti mwi rier ia nimwə səvəi Kumwesən, maməkwein əpwəmwis iərmama nəha raməkure utə ia nəpuə mamını mə, “Uvehi nau ikou səim, mərai raka nərmama ia təkure tıprənə. Nəpın tukərai raka irəha irə ruvəuvehe tı nəri nə mə irəha həmwhen ia nəveginien sə ruvəmruə ia nəmhien.”

¹⁶ Ro iamınhi irə iərmama sə raməkure utə ia nəpuə ruini pen nau ikou səvənhi ia təkure tıprənə,

mərai raka nərmama ia təkure tīprənə rəmwhen kamo ia nəveginien sə ruvəmruə ia nəmhien.

¹⁷ Agelo riti mwi rier ia nimwə səvəi Kumwesən fwe ia neiai, mauvehi mwi nau ikou riti səvənhi rəhiə.

¹⁸ Nənə agelo riti mwi rier, in agelo sə ramətui ti napw ia təkure nifatə. In rier məkwein əpwəmwis agelo sə rauvehi nau ikou mini mə, “Uvehi nau ikou səim, mərai raka nərmama ia təkure tīprənə rəmwhen kamo ia tīpwe krep sə rīmarei.”

¹⁹ Ro iamīnhi irə agelo nəha ruini pen nau ikou səvənhi ia təkure tīprənə, mərai raka nərmama ia təkure tīprənə rəmwhen kamo ia tīpwe krep sə rīmarei, nənə mārarki pen irəha ia kwopun asori riti. Tukeivə testesi irəha ikīn rəmwhen kamo ia tīpwe krep sə rīmarei mə nisen traris. Kwopun nəha iruə ia taon, kwopun sə Kumwesən truvehi irapw niemaha səvənhi ikīn.

²⁰ Nənə keivə testesi nərmama me nəha rəmwhen kamo ia tīpwe krep sə rīmarei mə nisen traris. Nitenraha rier ia kwopun nəha maiu meste nari fwe tri-hantret kilometa. Ko hos ravən irə netə nəha rutə meste tərhun.

15

Nagelo irəha sefen kamhəuvehi nərpwīnien irəha sefen

¹ Iakəti pen fwe ia neiai mətoni mwi nīmətien riti mwi rasori iakərkərinari irə. Nagelo irəha sefen kamhəuvehi nərpwīnien me irəha sefen. Nərpwīnien me nəha irəha sampam ti nəri nə mə

nəpɪn tuhəier pam nənə niemaha səvəi Kumwesən riwən.

² Nənə iakətoni nari riti rəmwhen ia təsi kɪno ia klas kə kərapi irə irau napw. Iakətoni mwi nərmama nepwɪn kamhərer ia nɪkarkare təsi nəha. Nərmama me nəha hənəpwəh nəsenien nərimɪru mɪne nəri kuyrhəkin kuvnhi nərimɪru irə mɪne nampa sə ramahatən nəghɪn mə trasori ia nɪrəha. Irəha kamhərer ia nɪkarkare təsi kɪno ia klas. Ia rəghɪnraha kamhəuvehi nəri kauəsi kaməni nɪpu irə Kumwesən rɪməuvei pen mɪnraha.

³ Irəha kamhani nɪpu səvəi Moses iərmama sə ro tukwini nari m Kumwesən, mɪne nɪpu səvəi kwəti sipsip, mamhani mə,

“Iərimənu Kumwesən sə ikəuvehi nɪskaiien me pam,
nərimnari me səməme ikamo hasori kətoni kamərkərinari irə!

Ik kɪg sə ikamərimənu ia tənəmtənə me,
suatuk me səim ikamesi pen suatuk me səvəi natukwatukwien mɪne nɪpərhienien!

⁴ Nərmama me pam tuhaməkeikei mhəsiai ik,
mhəuvehi utə nəghɪm,
tɪ nəri nə mə ik əpa Iəmə ikinan.

Nərmama ia tənəmtənə me pam tuhəuvehe mhənɪmwi nukurhunraha ia nənimem mhəsiai ik
tɪ nəri nə mə ikɪno raka noien atukwatukw me səim nərmama hənətoni.”

⁵ Irəha hani raka nɪpu nəha, nənə iakəti pen mətoni kəsevər ia kwopun ikinan anan ia nəkwai nɪmwə tapolen fwe ia neiai.

⁶ Nagelo me naha iraha sefen hajer ia nimwə tapolen naha, mamhəpeki nərpwinien me naha sefen. Tinari səvənraha kino ia linen sə rəpsan mamser. Həkwani nari kino ia kol rukurau ia kwənpwenhinraha.

⁷ Nənə nərımıru me naha kefə riti ripeki pen pesin me səməme kino ia kol muvei pen kuatia kuatia m nagelo me naha sefen. Pesin me naha həukuər ia niemaha səvəi Kumwesən, Kumwesən sə ramarə ia nuk nuk me.

⁸ Ia nəpin naha nimwə tapolen ruvehe mukuər ia nise napw, ti nəri nə mə Kumwesən ramarə ikin, mamser, mamə nəgsen. Iərmama riti ko ripkuvnimwə mhə ia nimwə naha meste nərpwinien me sefen səməme nagelo sefen kamhəpeki tuho sampam irə.

16

Pesin me iraha sefen həukuər ia niemaha səvəi Kumwesən

¹ Nənə iakregi reri iərmama riti raməgkiari asori fwe ia nimwə səvəi Kumwesən, mamini pen ti nagelo me naha sefen mə, “Həuvən mətəgi irapw ia təkure tiprənə pesin me naha sefen həukuər ia niemaha səvəi Kumwesən.”

² Agelo sə rakupwən revən mətəgi irapw pesin səvənhi ia təkure tiprənə. Nənə nərmama me naha səməme mak səvəi nərımıru ramarə ia nirəha, mine səməme kamhənimwi nukurhunraha ia nəmri nəri kiməuvrhəkin kuvnhi nərımıru irə,

15:6: Rev 15:1 **15:7:** Rev 14:10 **15:8:** 1King 8:10-11, Aes 6:4, Esik 44:4 **16:1:** Aes 66:6, Rev 16:17, Sam 69:24, Jer 10:25, Sef 3:8
16:2: Eks 9:10, Dut 28:35, Rev 13:12-17

mamhəsiəi in, nīpwrānraha ruvehe mukuər ia nīmwapw me. Nīmwapw me nəha hərəha mamho nəmisəien mīnraha.

³ Agelo sə ro kəru irə rətəgi irapw pesin səvənhi ia təsi, nənə təsi ruvehe mo netə irə rəmwhen ia nite iərmama ruvəmhə, narimnari me kamhəmīru ia reri təsi hemhə pam.

⁴ Agelo sə ro kahar irə rətəgi irapw pesin səvənhi ia nui aris me mīne nəmri nui me, nənə irəha həuvehe mho netə ia nīrəha.

⁵⁻⁶ Nənə iakregi agelo sə ramərimənu ia nui me rini mə,

“Kumwesən Ikinan. Ik ikinarə fwe kupwən muvehe meste mwi ipwet mīne.

Təkwətəkwuni ikamo noien atukwatukw,
mamərpwīn noien ərəha me i,
mauvei pen netə mīnraha hamənīmwi.

In i nərəkuien atukwatukw səvənraha,
ti nəri nə mə irəha hənousi əpune nərmama
me səim mīne profet me səim nitenraha
raiu.”

⁷ Nənə iakregi reri iərmama riti ruku pen ia nifatə ramini mə,

“Ouəh pərhiēn Iərimənu Kumwesən sə ikauvehi
niskaiien me pam,
nəkiriien me səim hatukwatukw mho
nīpərhiēnien!”

⁸ Nənə agelo sə ro kefə irə rətəgi irapw pesin səvənhi ia meri, nənə Kumwesən rəsēni nukwəsikər mə trənhi nərmama rəmwhen ia napw.

16:3: Eks 7:17-21 **16:4:** Sam 78:44 **16:5-6:** Sam 79:3, Sam 119:137, Aes 49:26, Rev 1:4 **16:7:** Sam 19:9, Rev 15:3, 16:14, Rev 19:2

⁹ Nəpnəpanien səvəi nukwəsikər rahi irəha, nənə irəha həni ərəha nəghi Kumwesən sə ramərimənu ia nərpwinien me nəha. Irəha həpwəh nırərigien ia noien ərəha me səvənraha, mhəpwəh nuvehi utəien nəghin.

¹⁰ Agelo sə ro krirum irə rətəgi irapw pesin səvənhi ia jea sə nərimiru raməkure irə mamərimənu, nənə kwopun me pam ia nəkwai nitətə sə nərimiru ramərimənu irə həuvehe mhəpitəv pam. Nərmama kamhəregi nəmisəien, mamhahi nəraminraha tukwe.

¹¹ Irəha kamhəni ərəha Kumwesən fwe ia neiai ti nəmisəien me mine nimwapw me səvənraha, mhəpwəh nırərigien ia noien ərəha me səvənraha.

¹² Nənə agelo sə ro sikis irə rətəgi irapw pesin səvənhi ia nui aris asori nəha nəghin nə Iufretes, nənə nui aris nəha ramə, mo suatuk səvəi kig me havən irə mhəuku peraha.

¹³ Ia nəpin nəha iakətoni nənimwin əmkemik kahar harəmwhen ia frok. Riti rier ia nipəgi nəkwai snek asori, riti rier ia nipəgi nəkwai nərimiru, nənə riti rier ia nipəgi nəkwai profet eikuə.

¹⁴ Nənimwin mirəhar nəha irəhar nəremhə me kamharo nımtətien me. Irəhar harier, mhərevən ti kig me ia tənəmtənə me pam, mharousəsimwin irəha mə tuharuagən ia nəpin asori səvəi Kumwesən, Kumwesən sə rauvehi nıskaiien me pam.

¹⁵ “Həregi ro! Iou iakauvehe rəmwhen ia rakres! İərmama sə ramətui a məpwəh napriien rerin

16:9: Rev 9:20-21, Rev 16:21 **16:10:** Eks 10:22, Aes 8:22 **16:11:** Rev 9:20-21, Rev 16:21 **16:12:** Aes 11:15, Jer 50:38 **16:14:** Rev 16:7, Rev 19:6,15,19 **16:15:** Rev 3:3,18

tragien. Rərəha in riḗpeki raka tinarī səvənhi ti napriien kətoni in ramavən auər a nənə in rauris tukwe.”

¹⁶ Nəremhə mirəhar nəha harousəsīmwin pen kig me nəha ia kwopun riti nəgkiariien Hipru rani mə, “Amaketon.”

¹⁷ Agelo sə ro sefen irə rətəgi pen pesin səvənhi ia nimagouagou, nənə iakregi Kumwesən raməgkiari fwe ia nəkwai nimwə səvənhi. Rerin ruku pen ia jea sə in raməkure irə mamərimənu, mamini mə, “In i sampam!”

¹⁸ Nənə nouapirien rəhiapw, karuəruə rərkwəpahar, kregi nərkərikien, nīmwnīmwiien asori riti ravən. Nīmwnīmwiien nəha rasori pik anan. Fwe Kumwesən rino iərmama ia təkure tiprənə meste pehe nəpin nəha kipkətoni raka mhə nīmwnīmwiien riti ro iamini irə ia nəpin riti.

¹⁹ Nīmwnīmwiien nəha ravən meitehi taon asori nipərin kahar, nənə taon me ia tənəmtənə me həsas pam. Kumwesən rerin rirhi taon asori nəha Pəpilon, nənə in ruvehi pen kap riti rukuər ia waen maməkeikei min mə trənimwi pam. Waen nəha in niemaha səvəi Kumwesən rəpi pik in ti taon nəha.

²⁰ Tənə əmweris me pam hap mhəiwən. Kipkətoni mhə mwi təkue me.

²¹ Aes me səməme həmwhen ia kəpwier asori həukrutə ia nimagouagou mhəsas pen ia nərmama. Ko kəkiri kəpwier me nəha kuatia kuatia nipamien səvənhi rəmwhen ia fifti kilo. Nəpin nərmama hətoni aes me nəha kamhəsas pen

16:16: Jaj 5:19, Sek 12:11 **16:17:** Rev 16:1 **16:18:** Rev 4:5
16:19: Rev 14:10 **16:20:** Rev 6:14 **16:21:** Eks 9:24, Rev 11:19,
 Rev 16:9,11

ia nirəha iam̄inhi irə, irəha hən̄i ərəha Kumwesən, ti nəri nə mə nərpw̄inien nəha in ramo m̄inraha riskai pik anan.

17

*Taon asori Pabilon rəmwhen ia pran səvəi su-
atuk*

¹ Nənə nagelo me nəha sefen kamhəuvehi pesin me nəha sefen riti ia nirəha ruvehe m̄ini pehe tukwiou i m̄ə, “Uvehe ro. Prən asori fwe raməkure ia nui me həpik, iakuə takahatən nərpw̄inien səvənhi pwəh ikətoni. Prən nəha in pran səvəi suatuk.

² Kig me ia təkure t̄iprənə hən̄o əpnəpen raka nari irəha min. Noien ərəha sə prən nəha ramo irəha nərman me rəmwhen ia waen riti. Nərmama ia təkure t̄iprənə hən̄ənimwi raka waen nəha mamhakonə irə.”

³ Nənə ia vison nəha Nən̄imw̄in rəriari miou, iakətə agelo nəha ruvehi iou iarouevən fwe ia kwopun akwesakwes ik̄in. Ia kwopun nəha iakətoni pran riti raməkure utə ia nərim̄iru riti. Nərim̄iru nəha rəruevəv pik k̄irai pen nəhag me ia n̄ipwran me p̄am. Nəhag me nəha kamhən̄i ərəha Kumwesən. Nərim̄iru nəha kənkapwə sefen, kənkapati ten.

⁴ Pran nəha tinari səvənhi rəmwhen ia tihi natis, məruevəv pik. In ramo pen marəmarə me ia n̄ipwran, marəmarə me nənimen rutə pik k̄ino ia kol m̄ine kəpwier amasan me m̄ine perel me. In rauvehi kap riti ia rəgin k̄ino ia kol. Kap nəha

rukuær ia noien me nərman me kamho irəha min hərəha pik mhəmkemik ia nəmri Kumwesən.

⁵ Ia nīpwənan kirai pen nəghin riti sə nīpwrān rərkwafə. Rani mə,

TAON ASORI PAPILON

MAMA SƏVƏI NĪPRAN ME PAM SƏVƏI SUATUK
NUKUNE NOIEN ME PAM SƏMƏME HƏRƏHA PĪK
IA TƏKURE TĪPRƏNƏ

⁶ Nənə iakətoni mə prən nəha rinousi əpune nərmama me səvəi Kumwesən mine irəha səməme həməni irapw Iesu. Rəmwhen in rinənimwi nitenraha mamakonə irə. Nəpīn iakətoni prən nəha iakərkəri asori nari irə.

⁷ Mətə agelo rini pehe tukw iou i mə, “Ikamərkərinari iamīnhi irə ti nəfe? Iou takəusiəre pui pehe nīpwrāi nəri nəha ikamətoni, mo nukurənien i mə sin nəha prən nəha mine nəfe nəha nərīmīru nəha in raməkure irə kənkəpwə sefen kənkəpati ten.

⁸ Nərīmīru nəha ikətoni ramīru fwe kupwən, mətə təkwtəkwuni ruvəmhə, trīpko mhə tui rukri-rapw ia nīpəg sə rameiwaiu nukunen riwən mutə mier mevən kousi əpune. Nərmama kamharə ia təkure tīprənə səməme kīpkrai pen raka mhə nəghinraha fwe tui nəpīn tīprənə ramiwən ihi ia nəkukuə səvəi nīmīruien, irəha tuhətoni nərīmīru nəha, nənə həkərinari irə ti nəri nə mə ramīru fwe kupwən, mətə təkwtəkwuni ruvəmhə, nənə trīpkuvehe mwi.

⁹ Iərmama traməkeikei mukurən nari ti nukurənien nīpwrāi nəgkiariien i. Kənkəpwə nərīmīru nəha irəha sefen irəha nə təkuer me

səməme pran nəha raməkure utə ia nirəha. Irəha mwi kig me.

¹⁰ Kig me irəha krirum həuvəmwei raka, kuatia ramiru nəha təkwtəkwni mine, nənə riti mwi rəpwəh ihi nuveheien. Nəpɪn truvehē traməkeikei marə ouihi a.

¹¹ Nərimiru i sə ramiru fwe kupwən, mətə təkwtəkwni ruvamhə, in mwi in kig riti sə ramo eit irə, mətə in mwi in kig riti səvəi kig me nəha sefen. In trevən kousi əpune in.

¹² Kənkəpati me nəha ten ikətoni, irəha kig me ten həpwəh ihi nərimənuien, mətə irəha tuhəpkuvehi nasoriien mhərimənu ia nəpɪn ouihi a irəha nərimiru nəha.

¹³ Nətərigien səvənraha kuatia, nənə irəha tuhəuvei pen niskaiien səvənraha mine nasoriien səvənraha m nərimiru nəha.

¹⁴ Irəha tuharuagən irəha kwəti sipsip, mətə kwəti sipsip truvehē irapw niskaiien səvənraha ti nəri nə mə in lərimənu sə rasori ia nərimənu me pam, nənə, in Kig sə rasori ia kig me pam. Nərmama me nəha kamhərer irəha min irəha nəha nərmama səməme in rinəkwein irəha, mərpwi rəgɪn ia nirəha, nərmama səməme in rukurən nətigiteien ia nirəha.”

¹⁵ Nənə agelo rini pehe mwi tukw iou i mə, “Ikətoni nui me nəha pran səvəi suatuk raməkure ia nirəha. Nui me nəha irəha nərmama həpik tekɪnraha səpəmsəpə, nəgkiariien me səvənraha səpəmsəpə, həuku pen ia kwənəkwus me səpəmsəpə.

¹⁶ Nərimiru nəha mine kənkəpati me nəha ten

səməme ikətoni, irəha tuhəmwəki pran səvəi su-
atuk, mhəpeki raka pam narimnari me səvənhi,
mhəpwəh in ramaiu auər a. Irəha tuhani nusan
mhəuvani əmwesi in ia napw.

¹⁷ Irəha tuho iamīnhi irə ti nəri nə mə Kumwesən
rinəmri ia nətərigien səvənraha mə tuho rəmwhen
sə in rokeikei. Nətərigien səvənraha truvehe
mo kuatia i, nənə irəha tuhəuvei pen niskaiien
səvənraha m nərimiru mə trərimənu meste
nəgkiariien səvəi Kumwesən ruvehe mukuə.

¹⁸ Prən nəha ikətoni in taon asori nəha sə
ramərimənu ia kig me pam ia təkure tīprənə.”

18

¹ Kurirə ia narimnari me i, iakətoni agelo riti
mwi rukrutə ia neiai mameiwaiu pehe. In rauvehi
nasoriien sə rasori. Nukuraanien sə ruku pen irə
raməhiəpwīn pam tīprənə.

² Rəkwein əpwəmwis mīni mə,
“In ruvəmwei! Taon asori nə Papilon ruvəmwei!
Təkwtəkwni nəha nəremhə me kamharə
ikīn.

In kwopun nənimwīn ərəha me mīne menu
me səməme həkemik kaməmwəki irəha
kamhərkwafə ikīn.

³ Taon nəha rəmwhen ia pran riti səvəi suatuk.
Nərmama me pam ia tənəmtənə me hənənimwi
raka waen sənmwīn.

Waen nəha in noien ərəha sə nərman me
kamho irəha min.

Kig me ia təkure tīprənə həno ənnapen raka nari
irəha prən nəha.

Nərmama ia təkure tɪprənə səməme
kəmhəmri pen nəmri nari ia narimnari
irəha nautə səvənraha ruvəuvehe minasori
ruku pen tɪnoien ərəha me səvəi prən nəha.”

⁴ Nənə iakregi mwi reri iərmama riti fwe ia neiai
rini mə,

“Həier irə nərmama me səiou
mɪnuə noien ərəha səvənhi trəpwəh nuvehi
pekiniən kimiaha,
nənə kimiaha tihəpwəh nuvehien
nərpwɪniən riti səvənhi.

⁵ Noien ərəha me səvənhi rasori rutə ipaka rirapi
neiai,
ro pen Kumwesən rəpwəh nenouenouien
nərəhaien me səvənhi.

⁶ Kimiaha tiho irə rəmwhen rino ia kimiaha.
Narimnari me səməme in rino ia kimiaha,
kimiaha tihaməkeikei mhərpwɪn pen m kəru
mɪn.

In rɪməvi pen nənimwiien skai kuation ia kap
səkimiaha,
kimiaha tihaməkeikei mhəvi pen nənimwien
skai ia kap səvənhi m kəru.

⁷ Taon nəha rəmwhen ia pran riti sə rauvehi utə
atukw a in,
mamarə ia narəien sə rukuər ia narimnari
amasan me.

Ro iamɪnhi irə kimiaha tihaməkeikei mhəuvei pen
nəmisəien mɪne nasəkien mɪn rəmwhen irə.
In rani ia rerɪn mə,

‘Tou prən asori iakaməkure ia kwopun i
mamərimənu.

18:4: Aes 48:20, Jer 50:8, Jer 51:6,45, 2Kor 6:17 **18:5:** Jen
18:20-21, Jer 51:9 **18:6:** Sam 137:8, Jer 50:15,29, 2Tes 1:6 **18:7:**
Aes 47:7-9

Ripko mhə iou pran sə iərman səvənhi ru-
vamhə.

Ko iapkasək mhə ia nəp̄in riti.’

⁸ Prən nəha ramərpwi atukw a in iam̄inhi irə ro
pen nərpw̄inien me səvənhi tuhəuvehe ia
nəp̄in kuatia a:

nemhəien, nasəkien, mine nukumhə.

Napw trahi prən nəha,

t̄i nəri nə mə Iərimənu Kumwesən sə rauvei
pen nərpw̄inien min niskaiien səvənhi ra-
sori.”

⁹ Nəp̄in kig me səvəi t̄iprənə səməme həno
əpnapen raka nari irəha prən nəha nənə mharə
irəha min ia narəien sə rukuər ia narimnari
amasan me tuhətoni nise napw sə ramahi in, nənə
rerinraha trəpou hasək tukwe.

¹⁰ Nəmisəien səvənhi tro irəha həhek̄ir, nənə
mhərer pen a isipw̄in mə,

“Aueh taon asori!

Aueh Pabilon taon sə nəgsem rasori!

Nərpw̄inien səim ruvəuvehe ia aoa kuatia a.”

¹¹ Nərmama me ia təkure t̄iprənə kamhəmri pen
nəmri nari ia narimnari tuhasək t̄i prən nəha t̄i
nəri nə mə iərmama riti mwi riwən truvehi nəmri
narimnari me səvənraha.

¹² Narimnari me səvənraha rəmwhen ia aean
mi nəha kol mine silva, mine kəpwier amasan
me, mine perel me, mine t̄inari amasan nəha
linen, mine t̄inari sə ro tihi natis irə, mine t̄inari
nəha silik, mine t̄inari sə rərueəv p̄ik, mine nei
me səpəmsəpə n̄ipekinraha rapein amasan, mine

narimnari me səpəmsəpə kɪno ia kənkəpati elefen, mine narimnari me səpəmsəpə kɪno ia nei nənimen rutə pɪk, mine aean me nepwɪn rəmwhen ia prons, mine kəpwier amasan nəha mapil,

¹³ mine teki nei sinamon, mine nɪmwai nari kavi rərəgi pen ia nəveginien, mine nɪmwəkmwəki nari kuvani nɪpekɪn rapein amasan, mine nise nei mi nəha fragkɪnsens mine mɪr, mine waen, mine oel, mine flaoa, mine kwənuni wit, mine kau me mine sipsip me, mine hos me mine kat me hos me kəmhəvi, mine slef me, slef me nə irəha nərmama.

¹⁴ “Narimnari amasan me pam səməme nətərigien səim ramevən ia nɪrəha, hənəpwəh ik mhəuvavən.

Nautə me pam səim mine marəmarə me pam səim ikinətə wau raka ia nɪrəha, nənə ko ipkətoni mhə mwi irəha ia nəpɪn riti.”

¹⁵ Nərmama me nəha səməme kəmhəmri pen nəmri nari ia narimnari me nəha həpeki nautə rɪpɪk ruku pen tɪ prən nəha. Irəha tuhəhekɪr nəmisəien səvəi prən nəha, mhərer pen a isipwɪn tukwe in, mamhasək əpwəmwis

¹⁶ mə,
“Aueh! Aueh taon asori!
In rəmwhen ia pran ramarkahu ia tɪnari amasan i kani mə linen sə ro tihi natis irə raməruerəv pɪk.

In ramo pen marəmarə me ia nɪpwran, marəmarə me nənimen rutə pɪk kɪno ia kol, mine kəpwier amasan me, mine perel me.

¹⁷⁻¹⁸ Mətə kouraha pam nautə me səvənhi ia aoa kuatia a.”

Nənə nəmə səməme kamhəkəkini nitətə ia təsi, mine nərmama səməme kamhərəku nitətə mamhəputə, mine nəmə səməme kamhowok ia nəkwai nitətə, mine nərmama səməme nitətə rapeki narimnari səvənraha muvehe mipeki parei kamhəmri pen nəmri nari ia nirəha, mamhəuvehi mane irə, irəha pam hətoni nise napw sə ramahi prən nəha, mhərer pen a isipwın tukwe in, mamhasək əpwəmwis, mamhəni mə,

“Taon asori riti riwən rəmwhen ia taon nəha!”

¹⁹ Irəha hərki pen nıməkwrur ia kənkəpwənraha, rerinraha rəpou, kamhasək, mamhəni mə,

“Aueh! Aueh taon asori!

Nərmama me pam səməme nitətə səvənraha ramaiu ia təsi,

irəha nautə səvənraha ruvehe masori ia narimnari me səim!

Mətə kouraha pam narimnari me səim ia aoa kua-tia a.”

²⁰ Mətə nıpu riti mwi rani iamınhi irə minuə,

“Kımiaha ia nitətə ia neiai, kımiaha nərmama me səvəi Kumwesən, mine aposol me mine profet me,

rerimiaha traməkeikei magien,

tı nəri nə mə Kumwesən rınərpwın noien ərəha prən nəha rino ia kımiaha!”

²¹ Nənə agelo riti nəgsen rasori ruvehi kəruətərei asori riti mərarki pen i ia nəkwai təsi mını mə,

“Tukəraki irapw akwauakw taon asori nəha Papi-lon iamınhi irə,
nənə tukəpwəh nətoniien mwi in ia nəpın riti.

18:19: Esik 27:30-34 **18:20:** Aes 44:23, Dut 32:43, Jer 51:48

18:21: Jer 51:63-64, Esik 26:21

22 Ia niram taon Papilon tɪpkregi mhə mwi nərmama səməme kamhəuəsi nəri kauəsi kaməni nɪpu irə,
uə nərmama səməme kamhəse tərhe nau mine kisɪpw.

Ia niram tɪpkətoni mhə mwi iərmama sə ramarpəkau amasan narimnari me.

Tɪpkregi mhə mwi kəpwier ramərari maməkwaɪ ətestesi kwənuni wit kamo flaoa i.

23 Nukuraanien səvəi laet tɪpkəhiapw mhə mwi ia niram,

nənə tɪpkregi mhə mwi reri iərman mine pran səməmi krauni sɪmwɪn tɪ narəien vi səvənrau.

Tro iamɪnhi irə tɪ nəri nə mə fwe kupwən nərmama me səim səməme kamhəmri pen nəmri nari ia narimnari irəha kamhəuvehi nasorien ia təkure tɪprənə.

Nərmama ia tənəmtənə me pam hətoni nɪmtətien me nəha ikino ia niskaiien səvəi iəremhə reikuə ia nirəha.

24 Ia taon nəha Papilon Kumwesən rətoni nite profet me mine nərmama me səvənhi.

Nərmama me pam ia təkure tɪprənə səməme kɪnousi əpune irəha Kumwesən rətoni nitenraha ia taon nəha.”

19

Nərmama fwe ia neiai həgnəgini Kumwesən

18:22: Aes 24:8, Esik 26:13 **18:23:** Jer 7:34, 16:9, Jer 25:10, Aes 47:9 **18:24:** Jer 51:49, Mat 23:35, Rev 17:6

¹ Kurirə ia narimnari me i iakregi reri nari riti rəmwhen ia nərmama həpik fwe ia neiai, kamhəgkiari rerinraha rupwinari mamhəni mə, “Pwəh səgnəgini Iərimənu Kumwesən səkitaha! In rauvehimiru kitaha. Nasorijen mine niskaiien səvənhi əpa.

² Nəkirien me səvənhi ho nipərhienien, mhatuk-watukw.

In rinərpwin raka noien ərəha səvəi taon asori nəha Pəpilon, ti nəri nə mə taon nəha rəmwhen ia pran səvəi suatuk rouraha nərmama ia təkure tīprənə i ia noien ərəha səvənhi.

Kumwesən ruvəuvei pen raka nərpwinien min, ti nəri nə mə kousi əpune səvənhi iotukwini-nari me ia taon nəha.”

³ Nənə irəha həgkiari asori mwi mə, “Pwəh səgnəgini Iərimənu!

Nise napw sə ramahi taon nəha rautə ia nuk nuk me ko ripkiwən mhə.”

⁴ Ia nəpin nəha nəmə asori me nəha twenti-fo mine nərimiru me nəha kefə hənimwi nukurhundraha ia nəmri Kumwesən sə raməkure ia jea səvənhi mamərimənu, mhəsiai in, mhəni mə, “Ouəh! Pwəh səgnəgini Iərimənu!”

⁵ Nənə reri iərmama riti ruku pen ia jea Kumwesən raməkure irə mamərimənu, mini mə, “Kimiaha nərmama hiamə tukwini nari m Kumwesən, mamhəsiai in, nəri auər a mə hiaməuvehi nasorien uə hiəpkuvehi mhə nasorien,

kimiaha pam tihamækeikei mhægnægini
Kumwesæn sækitaha!”

⁶ Nænə iakregi nari riti rəmwhen ia nærmama
həpik kamhægkiari, rerinraha rəmwhen ia nui sə
ramivə mamierig, mine karuəruə ramərkwəpahar.
Irəha həni mə,

“Pwəh səgnægini Iərimənu Kumwesæn sækitaha
ti nəri nə mə in rauvehi niskaiien me pam,
mamərimənu!

⁷ Pwəh sagien, mhagien pik, mhəuvehi utə nəghin,
ti nəri nə mə nəpən ruvəuvehe tukiri pen vi a
pran m kwəti sipsip!

Pran səvənhi rinəpnəpenə pam raka,

⁸ mamarkahu ia tinari amasan nəha linen
kuvei pen min rəpsan məmher.”

(Tinari amasan nəha linen ramahatən pen
noien atukwatukw me səvəi nærmama me səvəi
Kumwesæn.)

⁹ Nænə agelo nəha rini pehe tukw iou i mə,
“Rai pen nəgkiariien i ia nəkukuə. ‘Nærmama
səməme kinəkwein ia nirəha minuə tuhəuvən ia
nəveginien asori səvəi kwəti sipsip irəha rerinraha
tragien.’ ” Nænə agelo nəha rarə mini mwi tukw iou
i mə, “Nəgkiariien me i nəgkiariien pərhien səvəi
Kumwesæn.”

¹⁰ In rini iamənhi irə, nənə iakinimwi nukurhuk
mi ia nisun mə takisiai in, mətə in rini pehe
tukw iou mə, “Tikəpwəh noien iamənhi irə!
Krau iotukwininari mi a, kitaha piam me
səməme kamhəuvehi nəgkiariien i Iesu rini mə ro
nipərhienien. Tikamækeikei minimwi nukurhum
mi ia nəmri Kumwesæn əpa, misiai in, ti nəri nə

mə nəgkiariien i Iesu rini mə ro nīpərhiēnien in nukune nəgkiariien me səvəi profet me.”

Iərmama sə raməkure ia hos əpsan

¹¹ Nənə iakətoni kəsevər ia neiai. Iakəti pen mətōni hos əpsan riti. Iəmə sə raməkure irə nəghin nə “Iəmə sə Kamətīgite Irə. In rani nīpərhiēnien.” Nəpīn in rəkiri nərmama uə raruagən, mətə in ramo ia noien sə ratukwatukw a.

¹² Nənimen mi krouəmwhen ia nərami napw. Ia təkure kənkəpwə kəfəfau səvəi nīsiāiien me həpik. Kirai pen nəhag riti irə, mətə iərmama riti rīpkukurən mhə nahag nəha, in əpa in rukurən.

¹³ In ramarkahu ia tīnari riti kineitesi ia netə. Nəghin sə kaməkwein in irə in nə “Nəgkiariien səvəi Kumwesən.”

¹⁴ Naruagən me ia neiai kamhəkure ia hos əpsan me mamhəkurirə in, mamharkahu ia tīnari amasan nəha linen rəpsan məmher.

¹⁵ Iərmama nəha nau riti səvəi naruagənien rəhiə ruku pen ia nīpəgi nəkwān mamier. Ia nau nəha in truvehi irapw nīskaiien səvəi nərmama ia tənəmtənə me, nənə muvehi nəri skai riti sə rəmwhen ia nep ramahatən pen nasoriien səvəi kīg, rauvehi mamərimənu ia nīrəha. In tro rīskai anan ia nīrəha rəmwhen kamo ia tīpwei krep sə rīmarei nərmama kamheivə testesi mə nīsenraha traris. Noien nəha in nəha Kumwesən i rauvehi nīskaiien me pam truvehi irapw niemaha asori səvənhi irə.

19:11: Rev 1:5, 6:2, Sam 96:13, Aes 11:4 **19:12:** Rev 1:14, 2:17

19:13: Aes 63:1-3, Jon 1:1,14 **19:15:** Rev 1:16, 12:5, Rev 14:20, 4:8, Rev 21:22

16 Kimərai pen nəghin ia tinari səvənhi mine nuvan mə:

KIG SƏ RASORI IA KIG ME. İƏRİMƏNU SƏ RASORI IA NƏRİMƏNU ME.

17 Nənə iakəti pen mətoni agelo riti ramərer pen ia meri. In raməkwein əpwəmwis mani pen ti menu me səməme kamhəivə ia nimagouagou mə, “Həuvehe mhousəsimwın kimiaha me ti nəveginien asori səvəi Kumwesən.

18 Həuvehe mhani nıpwrai kig me, mine nəmə asori me səvəi naruagən me, mine nərmama nəgsenraha rasori, mine hos me, mine nərmama səməme kamhəkure ia hos me. Həuvehe mhani nıpwrai nərmama me pam: irəha səməme ko slef ia nirəha mine səməme kıpko mhə slef ia nirəha, irəha səməme kamhəuvehi nasoriien mine səməme həpkuvehi mhə nasoriien.”

19 Nənə iakətoni nərimiru nəha, mine kig me səvəi tiprənə, mine naruagən me səvənraha housəsimwın irəha me mə tuharuagən irəha İəmə sə raməkure ia hos mine naruagən me səvənhi.

20 Nənə naruagən me səvəi İəmə nəha həuvən mhəkwtəmhiri nərimiru nəha, mine profet eikuə nəha sə rinamo nımtətien me fwe kupwən nəpın rinamərer irau nərimiru nəha. (In rinamo nımtətien me nəha, mameikuə ia nərmama səməme kamhəuvehi mak səvəi nərimiru nəha, mine səməme kamhənımwı nukurhunraha ia nəmri nəri kuvrhəkin kuvnhi nərimiru irə mhəsiai in.) Irəha həkwtəmhiri irau, mhərarki pen miru a irau ia kwopun əmwhenımw nəha napw mine təpisi ərəha krauuək ikin.

²¹ Nənə kig me mine naruagən me səvənraha, Iəmə sə raməkure ia hos rərai əpune irəha ia nau səvəi naruagənien sə ruku pen ia nīpəgi nəkwān mamier. Nənə menu me pam hani nīpwrānraha tīpwīnraha rəsisi amasan.

20

Nuk wan-taosen

¹ Nənə iakətoni agelo riti rukrutə ia neiai mamei-waiu pehe, mauvehi ki riti ia rəgīn, ki səvəi nīpəg sə rameiwaiu nukunen riwən. In rauvehi mwi jen asori riti.

² In rəkwtəmhiri snek asori, snek sə rīnarə raka tui nəghīn nə Iəremhə uə Setan. Agelo nəha rəkwtəmhiri, mərihi səvəi nuk wan-taosen,

³ mərarki pen ia nīpəg sə rameiwaiu nukunen riwən, nənə məsisəg əknekīn irə mīnuə snek asori nəha trəpwəh mwi neikuəien ia nərmmama ia tənəmtənə me meste nuk wan-taosen ro sampam. Nəpīn nuk wan-taosen ro sampam, tukaməkeikei kifī nari irə səvəi nəpīn ouihi a.

⁴ Nənə iakətoni jea me nepwīn səvəi nəmə asori me. Nəmə asori me səməme kamhəkure ia jea me nəha, kuvei pen nasoriien mīnraha tuhaməkiri noien me mamhərpwīn. Nənə iakətoni nənimwi nərmmama səməme kīnərai əmwesi kənkəpwənraha ti nəri nə mə irəha kamhərer irəpw ti nīni irəpwien nəgkiariien amasan səvəi Iesu mine nəgkiariien səvəi Kumwesən. Irəha həpwəh nīnimwiien nukurhunraha ia nīsiāien ia nəmri nərimīru uə ia nəmri nəri kuvrhəkīn kuvnhi

nərimiru irə, mhəpwəh nuvehien mak səvənhi ia nīpwənanraha mine rəgīnraha. Iakətoni irəha həuvehe mhəmīru mwi, nənə mamhərimənu irəha Kristo meste nuk wan-taosən.

⁵ In i nəpīn sə Kumwesən rīməkupwən mo nərmama irə hətui mwi ia nemhəien. Mətə nərmama həuvamhə səməme in rīpko mhə irəha hətui mwi ia nəpīn nəha tuhəpkətui mhə mwi ia nemhəien meste nuk wan-taosən ro sampam.

⁶ Nərmama me i səməme Kumwesən rīməkupwən mo irəha hətui mwi ia nemhəien, irəha rerīnraha tragien, ti nəri nə mə irəha nəkur ikinan me səvənhi. Irəha tuhəpkemhə mhə mwi ia nemhəien sə ro kəru i, mətə irəha tuho pris me ia nīrəha, pris me səvəi Kumwesən mine Kristo, nənə mhərimənu irəha min ia nuk wan-taosən.

Setan trevən ia napw

⁷ Nənə nəpīn nuk wan-taosən ro sampam, tukifi nari ia Setan rier irapw ia kwopun kīnəsisəg əknekīn in ikin.

⁸ In trier irapw, mevən meikuə ia kwənəkwus me nəha səməme kamharə ia nīkare təkure tīprənə i kefə, nəghīnraha Kauk mine Makauk, nənə mousəsīmwin irəha mə tuharuagən. Nərmama me nəha tuhəpik məmwhen ia nīpəkīr ia təsi.

⁹ Iakətoni mə irəha həuvən ia kwopun me pam ia tīprənə, mhərer kuraukurau kwopun nərmama me səvəi Kumwesən kamharə ikin mine taon sə Kumwesən rokeikei pīk. Mətə napw riti rukrutə ia neiai meiwaiu pehe mahi irəha.

10 Nənə kuvehi Setan, iəremhə sə rineikuə ia nirəha, kuvehi, kərarki pen ia kwopun əmwhenimw nəha napw mine təpisi ərəha krauuək ikin. In nəha kwopun nəha kinərarki pen raka nərimiru ikin mine profet eikuə. Nənə tuko nəmisəien minrahar ia nəpın mine ia ran ia nuk nuk me.

Kumwesən rəkiri nərmama səməme həuvamhə, mərpwın noien me səvənraha

11 Ia nəpın nəha iakətoni jea asori riti rəpsan mine Iəmə sə raməkure irə mamərimənu. Tıprənə mine neiai krouap ti nənimen kıpəkətoni mhə mwi irau.

12 Nənə iakətoni nərmama həuvamhə səməme fwe kupwən kamhəuvehi nasoriien mine səməme həpkuvehi mhə nasoriien, irəha pam kamhərer ia nəmri Iəmə sə raməkure ia jea səvənhi mamərimənu. Nənə kripwegi nəkukuə me nepwın. Kripwegi mwi nəkukuə riti mwi, nəkukuə səvəi nimiruien. Nənə Iəmə nəha rəkiri nərmama həuvamhə mesi pen nəgkiariien kimərai pen ia nəkukuə me nəha, mərpwın atukwatukw noien me irəha həno fwe kupwən.

13 Təsi raraka ia nərmama həuvamhə səməme kamharə irə. Noien Iərmama Remhə mine Imwei Nəkur Həuvamhə irau mwi krouaraka ia nərmama səməme kamharə ia nirau. Irəha pam hətui mwi ia nemhəien səvənraha, nənə Iəmə nəha rəkiri irəha kuatia kuatia, mərpwın atukwatukw noien me irəha həno fwe kupwən.

20:10: Jen 19:24, Sam 11:6, Rev 19:20, 21:8 **20:12:** Dan 7:9-10, Mat 25:31-46, Wok Me 17:31, 2Kor 5:10, Rev 13:8 **20:13:** Rom 2:6, 1Pit 1:17, Rev 2:23, 22:12

14 Nənə kuvehi Noien Iərmama Remhə mine Imwei Nəkur Həuvamhə kərarki pen irau ia kwopun əmwhenimw nəha napw rauək ikin. Nəri nəha in nəha nemhəien sə ro kəru i.

15 Nərmama me pam səməme kəpkətoni mhə nəghinraha ia nəkukuə səvəi nimiruien kərarki pen irəha ia kwopun əmwhenimw nəha napw rauək ikin.

21

Jerusalem vi

1 Nənə iakətoni neiai vi mine tiprənə vi, ti nəri nə mə neiai akuas mine tiprənə akuas krouvehe rouiwən. Nənə təsi riwən mwi.

2 Nənə iakətoni taon ikinan səvəi Kumwesən, in nə Jerusalem vi, rukrutə ti Kumwesən ia neiai mameiwaiu pehe. Taon ikinan nəha ramser rəmwhen ia tinari sə pran rarkahu irə ia nəpən tukiri pen vi a in kuvei pen m iərman səvənhi.

3 Nənə iakregi reri iərmama riti rupwinari ruku pen ia jea sə Kumwesən raməkure irə mamərimənu, rini mə, “Hətə ro! Təkwtəkwuni nəha Kumwesən rino rukwənu səvənhi irəha nərmama. In tramarə irəha mənraha, nənə irəha tuhəuvehe nərmama me səvənhi. Kumwesən in tramarə ti nirəha, nənə muvehe Kumwesən səvənraha.

4 In trirai raka pam nise nənimenraha. Noien iərmama remhə mine nasəkien mine nəmisəien triwən, ti nəri nə mə narimnari tui me həuvehe mhəuvəiwən.”

20:14: 1Kor 15:26,55 20:15: Rev 13:8, 19:20 21:1: 2Tes 3:13
 21:2: Aes 52:1, 61:10, Hip 11:16, 12:22, Rev 3:12 21:3: 2Kron
 6:18, Sek 2:10, 2Kor 6:16, Rev 7:17 21:4: Aes 35:10, Aes 65:19

⁵ Nənə Iəmə sə raməkure ia jea mamərimənu rini mə, “Hətə ro! Iakamo narimnari me pam həuvehe mhərməvi.” Nənə in rarə mini mwi mə, “Rai pen nəgkiariien i ia nəkukuə, ti nəri nə mə nəgkiariien me i ho nıpərhiēnien nərmama həukurən nətigiteien ia nirəha.”

⁶ Nənə in rərari mini pehe tukw iou i mə, “Təkwtəkwiuni nəha kino sampam ia narimnari me pam! Iou i Alfa mine Omeka,^a nukunen mine nəkrəkwerin. Nərmama səməme həkwakwa iou takuvei pen nui minraha. Nui nəha kıpkuvehi mhə nənimen. Nəmri nui nəha rauvei pehe nui kauvehi nimiruien irə.

⁷ Iərmama sə triskai meste naruagəniēn ruku-rau, iou takuvei pen narimnari me səməme iakuvəni pen raka tukwe in. Iou takuvehe Kumwesən səvəhi, nənə in truvehe nərək.

⁸ Mətə nərmama səməme kamhəhekir ia nərmama, mhəpwəh nahatətəien, mamho noien əmkemik, mamhousi əpune nərmama, mamhakres pran, mamho klepa, mamhəuvehi nahak, mamhəfwaki m nənimwi nəri me, mine ieikuə me pam, imwənraha atukwatukw fwe ia kwopun əmwhənimw nəha napw mine təpisi ərəha krauuək ikin. Nəri nəha in nemhəien sə ro kəru irə.”

⁹ Nənə nagelo me nəha sefen kamhəpeki pesin me nəha sefen həukuər ia nərpwinien irəha sefen

21:5: 2Kor 5:17, Rev 4:2,10 **21:6:** Sam 36:9, Jer 2:13, Jon 7:37, Rev 1:8,17; 22:17 ^a **21:6:** Alfa in leta sə rukupwən ia alfapet səvəi nəkur Kris. Omeka in leta sampam. Nəhag i kaməkwein Kumwesən irə nıpwrən mə in nukunen mine nəkrəkwerin. Əvsini mwi Rev 21:6; 22:13. **21:7:** 2Saml 7:14 **21:8:** Mat 25:41, Hip 10:38-39, Rev 19:20; 21:27; 22:15 **21:9:** Rev 15:1

(nənə nərpwɪnien me nəha irəha nərpwɪnien sam-pam Kumwesən tro m nərmama), riti ia nagelo me nəha rini pehe tukw iou i mə, “Uvehe ro. Iakuə takahatən prən nəha, in pran səvəi kwəti sipsip, pwəh ikətoni.”

¹⁰ Nənə ia vison nəha Nənɪmwɪn rəriari miou iakətoni agelo nəha ruvehi iou iarouevən fwe ia təkuaer riti rasori məpwəmwɪs. Nənə in rahatən taon ikinan nəha Jerusalem iakətoni ruku pen ti Kumwesən ia neiai mameiwaiu pehe.

¹¹ Taon ikinan nəha rukuraan ia nukuraanien səvəi Kumwesən. Ramserser rəmwhen ia kəpwier amasan riti kani mə tiaspa rəmher rəmwhen ia klas.

¹² Nəpai riti rasori məpwəmwɪs rukuraukurau irə. Ia nəpai nəha kwəruə me irəha twelef. Nagelo me twelef kamhərer ia kwəruə me nəha. Ia kwəruə me nəha kimərai pen nəghi kwənəkwas me səvəi nəkur Isrel irəha twelef.

¹³ Kwəruə me nəha kahar ia nɪkare taon nəha peraha, kahar mwi ia nɪkaren prehi, kahar ia nɪkaren pesu, nənə kahar ia nɪkaren parei.

¹⁴ Kəpwier asori me irəha twelef kamhəkwtəmhiri əknekɪn nukune nəpai nəha səvəi taon nəha. Nənə kimərai pen nəghi aposol me twelef səvəi kwəti sipsip ia kəpwier me nəha.

¹⁵ Agelo sə raməgkiari miou rauvehi nari riti kɪno ia kol truvehi mak səvəi taon irə mɪne nəpai səvənhi mɪne kwəruə me ia nəpai nəha.

¹⁶ Nɪkare taon nəha irəha kefə. Nasoriien səvəi nɪkarkaren me mɪne nəpwəmwɪsien səvənraha rutə həmnəmwhen a. Agelo nəha ruvehi nəri nəha

rauvehī ia rəgin, muvehī mak səvəi nīkarkaren me, mətoni irəha kuation kuation nasoriiēn səvənhi mine nəpwəmwisien səvənhi rutə tu-taosen-fohantret kilometa.

¹⁷ In ruvehī mwi nīkīmkīmien səvəi nəpai nəha mətoni rəmwhēn ia sikisti-sikiš mīta. Mīta nəha sə agelo nəha rauvehī mak səvəi nari irə rəmwhēn a mwi ia mīta nəha nərmama kamhəuvehī mak səvəi nari irə.

¹⁸ Nəpai nəha kīno ia kəpwier amasan i tiaspa, nənə kuvrhəkin taon ia kol atukwatukw, kol sə rəmher məmwhēn ia klas.

¹⁹ Kəpwier asori me səməme kamhəkwtəmhiri əknekīn nukune nəpai səvəi taon nəha kəfəri pēn irəha ia kəpwier amasan me səpəmsəpə. Kīməkupwən kəmri pēn kəpwier amasan i tiaspa, sə ro kəru irə kəmri pēn kəpwier amasan i safaiā, sə ro kahar irə kəmri pēn kəpwier amasan i akat, sə ro kəfə irə kəmri pēn kəpwier amasan i emeral,

²⁰ sə ro krirum irə kəmri pēn kəpwier amasan i onikis, sə ro sikis irə kəmri pēn kəpwier amasan i kanilian, sə ro sefen irə kəmri pēn kəpwier amasan i krisolaet, sə ro eit irə kəmri pēn kəpwier amasan i malakait, sə ro naen irə kəmri pēn kəpwier amasan i topas, sə ro ten irə kəmri pēn kəpwier amasan i kalsetoni, sə ro eleven irə kəmri pēn kəpwier amasan i takwoes, nənə sə ro twelef irə kəmri pēn kəpwier amasan i ametis.

²¹ Kwəruə me nəha twelef təpinhə me səvənraha kīno ia perel irəha twelef. Təpinhə kwatia kwatia ko ia perel kwatia kwatia. Nənə suatuk me fwe imwə ia taon nəha kīno ia kol atukwatukw, kol sə rəmher məmwhēn ia klas.

22 Nənə iapkətoni mhə nimwə riti kaməfwaki ikin ia nəkwai taon nəha, ti nəri nə mə nimwəfwaki səvənhi in nə İərimənu Kumwesən sə rauvehi niskaiien me pam mine kwəti sipsip.

23 İa taon nəha irəha tuhəpkətui mhə mwi meri mine məkwə mə trouəhiəpwın irəha ti nəri nə mə nukuraanien səvəi Kumwesən raməhiəpwın pam taon nəha, nənə kwəti sipsip in nə laet səvənhi.

24 Nərmama ia tənəmtənə me tuhavən ia nukuraanien səvənhi, nənə kig me ia təkure tiprənə tuhəpeki nautə amasan me səvənraha mhəuvmiwə ia taon nəha.

25 Kwəruə me səvəi taon nəha tukəpwəh nərepinhəien irəha ia nəpın riti, ti nəri nə mə nəpın ia nəpın triwən ia kwopun nəha.

26 Nərmama ia tənəmtənə me tuhəpeki nautə amasan me səvənraha mine narimnari me nərmama həməuvei pen mınraha ia nisaiien, nənə mhəpeki mhəuvmiwə ia taon nəha.

27 Narimnari me səməme həmkemik ia nəmri Kumwesən, mine nərmama səməme kamho narimnari səvəi naurisien, mine nərmama səməme kamheikuə, irəha tuhəpwəh nuvmiwəien ia taon nəha ia nəpın riti. Mətə nərmama me a i səməme kimərai pen nəghınraha ia nəkukuə səvəi nimiruien sə kwəti sipsip rauvehi irəha əpa nəha tuhəuvmiwə ia taon nəha.

22

Nui aris kauvehi nimiruien irə

21:22: Rev 15:3 21:23: Aes 60:19-20, Rev 22:5 21:24: Aes 60:3,5 21:25: Aes 60:11 21:26: Sek 14:7, Rev 22:5 21:27: Aes 52:1, 1Kor 6:9-10, Rev 13:8, 21:8

¹ Nənə agelo rarə mahatən mwi nui aris riti iakətoni. Nui ia nui aris nəha nui kauvehi nimiruien irə. Nui nəha rəmher rəmwhen ia klas, raiu maku pen fwe ia jea sə Kumwesən mine kwəti sipsip krauəkure irə rouərimənu,

² mamesi pen suatuk ia kurkwai taon nəha. Nənə iakətoni nei kauvehi nimiruien irə ramərer ia nīkarkare nui nəha, maukuə m twelef ia nuk me pam ia məkwə me pam. Nənə nərmama ia tənəmtənə me pam kamhətimwi nīmwan ti no-masanien nemhəien me.

³ Ia nəkwai taon nəha tukəpwəh mwi nətonien nari riti sə Kumwesən raməkwein ərəha irə. Jea sə Kumwesən mine kwəti sipsip krauəkure irə rouərimənu trərer ikin. Nənə iotukwininari me səvənhi tuhamo nəkwān.

⁴ Irəha tuhətoni nənimen, nənə tukrai pen nəghin ia nīpwənanraha.

⁵ Nəpīn ia nəpīn triwən. Irəha tuhəpkətui mhə meri uə nari riti mwi truvei pen nukuraanien mīnraha, ti nəri nə mə Iərimənu Kumwesən səvənraha in trukuraan muvei pen nukuraanien mīnraha, nənə irəha tuhərimənu ia nuk nuk me.

⁶ Nənə agelo nəha rini pehe tukw iou i mə, “Nəgkiariien me i ho nīpərhienien nərmama həukurən nətigiteien ia nīrəha. Iərimənu Kumwesən səvəi nənimwi profet kupwən me rīnərhi pehe iou agelo səvənhi mə takuvehe mahatən narimnari me tripkō mhə tui həier pehe pwəh səvənhi iotukwininari me hətoni.”

22:1: Esik 47:1 **22:2:** Joel 3:18, Sek 14:8, Jen 2:9, Esik 47:12, Rev 22:14,19 **22:4:** Sam 42:2, Mat 5:8, Rev 3:12 **22:5:** Dan 7:18,27, Rev 5:10, 20:6, Rev 21:23,25 **22:6:** Rev 1:1

Triþko mhə tui Iesu ruvehe

⁷ “Həregi ro! Triþko mhə tui iakuvehe. Iərmama sə ramo nəgkiariien me səməme Kumwesən ruvei pehe, kamhəmak ia nəkukuə i, in rerin tragien.”

⁸ Iou Jon, iou iakiməregi mətoni narimnari me i. Nəpin iakregi mətoni raka narimnari me i, nənə iakinimwi nukurhuk mi ia nəmri agelo sə rahatən iou irə mə takisiai in.

⁹ Mətə in rini pehe tukw iou i mə, “Əpwəh noien iaminha irə! Krau iotukwininari mi a səvəi Kumwesən kitaha piam me i profet me mine nərmama me səməme kamho nəgkiariien me ia nəkukuə i. Nimwi nukurhum mi ia nəmri Kumwesən, misiai in!”

¹⁰ Nənə in rarə mini mwi tukw iou i mə, “Tikəpwəh nərkwafəien ia nəgkiariien me i Kumwesən ruvei pehe mik kamhəmak ia nəkukuə i ti nəri nə mə narimnari me i triþko mhə tui həier pehe.

¹¹ Nərmama səməme kamho noien ərəha pwəh kamhəmwur pen ia noien ərəha. Nərmama səməme kamho noien əmkemik pwəh kamhəmwur pen ia noien əmkemik. Nərmama səməme kamho noien atukwatukw pwəh kamhəmwur pen ia noien atukwatukw. Nərmama səməme kamho noien əmher pwəh kamhəmwur pen ia noien əmher.

¹² Həregi ro! Triþko mhə tui iakuvehe! Takuvehi nərəkuien səiou, muvehe, muvei pen m nərmama me pam resi pen narimnari me irəha həno.

22:7: Rev 1:3, 2:16

22:8: Rev 19:10

22:10: Rev 1:3, 10:4

22:11: Dan 12:10

22:12: Aes 40:10, 2Kor 11:15, Rev 2:16,23

¹³ Iou i Alfa mine Omeka,^a nukunen mine nækraekwerin. Iakinarə raka kupwən, nənə takarə mwi kurirə.

¹⁴ Nərmama səməme haikuas tinari səvənraha rəpsan, irəha rerinraha tragien. Takəseni irəha hani nukwai nei kauvehi nimiruien irə, nənə mhəukurau ia kwəruə me səvəi taon nəha mhəuvnimwə.

¹⁵ Mətə nərmama nepwin nəha ikin ko həpkuvnimwə mhə. Irəha nəha nərmama səməme həmkemik rəmwhen ia kuri me, mamho klepa, mamho nahak. Nərman mine nīpran səməme kamhəiri əpnəpen irəha me irəha nəha ko həpkuvnimwə mhə. Nərmama me pam səməme kamhousi əpune nərmama, mamhəfwaki m nənimwi nari me, mamhokeikei pik noien səvəi neikuəien tuharə fwe iruə.

¹⁶ Iou, Iesu, iakinərhi pehe agelo səiou mə truvehe mīni irapw narimnari me i tukumiaha nakalasia me. Iou i kig sə iakiməuku pen ia kwənəkwas səvəi Kig Tevīt. Iou iakəmwhen ia kəməhau kofətəteia sə rukuraan.”

¹⁷ Nənimwin Ikinan mine pran səvəi kwəti sipsip krauni mə, “Uvehe!” Nənə pwəh iərmama sə ramregi nəgkiariien i, in mwi rini mə, “Uvehe!” Nənə pwəh iərmama sə rəkwa kwa ruvehe. Iərmama sə rokeikei pwəh in rənimwi auər a nui sə kauvehi nimiruien irə.

22:13: Rev 1:8,17; 21:6 ^a **22:13:** Alfa in leta sə rukupwən ia al-fapet səvəi nəkur Kris. Omeka in leta sampam. Nahag i kaməkwein Kumwesən irə nīpwrən mə in nukunen mine nækraekwerin. Əvsini mwi Rev 21:6; 22:13. **22:14:** Rev 22:2 **22:15:** Rev 21:17
22:16: Nam 24:17, Rom 1:3, Rev 2:28, 5:5 **22:17:** Sing 8:14, Rev 21:6

18 Iou, Jon, iakamægkiari skai m nærmama sëmame kambahæregi nægkiariien me Kumwesən ruvei pehe miou kambahamak ia nəkukuə i. Trini minuə iərmama riti rakutan pen atukw nægkiariien riti səvənhi ia nægkiariien me i, Kumwesən truvei pen min nærpwinien me i nəkukuə i ramægkiari irə makutan pen mwi.

19 Trini minuə iərmama riti ripeci raka nægkiariien me nepwin ia nəkukuə i, Kumwesən tripeci raka namasanien me i nəkukuə i ramægkiari irə iərmama nəha tripkuvehi mhə riti. Namasanien me nəha nukwai nei kauvehi nimiruien irə mine kwopun riti ia taon ikinan nəha.

20 Iərmama sə rani irapw narimnari me i rini mə, “Pərhien tripkə mhə tui iakuvehe!”
Ouəh, pwəh ro iaminihi! Uvehe rə Iərimənu Iesu!

21 Pwəh namasanien səvəi Iərimənu səkitaha Iesu tamarə ti nærmama me pam. Ouəh, pwəh ro iaminihi!

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 18 Apr 2025 from source files dated 31 Aug 2023

26b0f540-c192-5878-be67-18ede9ab1416